

四庫全書

史部

欽定四庫全書

史部

湖廣通志卷

五十一

詳校官監察御史_臣陳化龍

檢討_臣德生覆勘

總校官知縣_臣繆琪

校對官助教_臣羅萬選

謄錄監生_臣李觀光

欽定四庫全書

湖廣通志卷五十

鄉賢志

長沙府

宋畢田楚紀長沙人真宗朝以吏部郎官兼王府侍讀一日遇講泣寒奏蠲臨湘七郡課租里人德之

孫方武

詳忠臣志

袁顯

詳忠臣志

丁仁楚紀醴陵人擢進士第參謀淮蜀制幕及高沙之變仁諭以順逆降之知無為軍依城築堰郡人感德名曰丁公堰繼解合肥之圍進知太平軍湖北漕使退居二十年卒年八十四

元許穎

詳孝子志

明夏原吉李東陽夏忠靖傳原吉字維詰其先曾稽人祖希聲元季為湖廣行省都事國初占籍湘陰父時敏湘陰教諭原吉領鄉薦升國子生入禁廡書誥

敕太祖見字格方正賜緋衣復遣人察諸生獨原吉
端坐正書心念之書滿當署職上曰原吉端厚特授
戶部主事擢右侍郎巡撫福建太宗入定大統進尚
書凡貢賦役法悉命詳定原吉酌古今議多從厚曰
不可使後難繼困吾民也兩浙大水三命原吉往治
至則奏罷蠹民妨政數十事輒訪耆宿相度地勢疏
河導渠修築隄堰俾水歸於海又奏發廩粟三十餘
萬石所活不可勝計乃分給牛種督之耕種吳人至

今懷之三年還掌部事請裁冗食節浮費又禁鹽鈔
法請弊凡水旱必奏請蠲租稅扈從幸北京復命兼
掌刑部二指揮冒支官糧上欲斬之元吉曰罪自有
律若實盜者何以加諸乃止八年上親討北邊命輔
太孫留守北京諭之曰朕以房玄齡委卿矣從太孫
周行鄉落取民蠶桑以進曰願知此味九年考績上
晏於便殿諭羣臣曰原吉乃太祖養成賢德欲觀古
名臣此其人也大臣科道言南北建都便利不同上

令廷辨元吉曰臣等罪也科道言是或尤其背初議
原吉曰吾輩歷職久言雖失幸上憐之若言官得罪
所損多矣衆始歎服上議親討北邊羣臣莫敢言原
吉約尚書方賓同諫遂獲罪籍其家惟賜鈔千貫餘
皆布衣瓦器召還問征敵得失執不變仁宗踐阼加
太子少傅進少保洪熙元年賜銀印一其文曰繩愆
糾繆有封奏則以識之象印一文曰正直以便處分
宣德三年賜範金銀印八其一曰含光正靖扈從巡

邊上取原吉等糗糒嘗之曰卿亦食此乎對曰臣得此食足矣隨營將士多餒者遂檄上供物以賜且徧賜將士上念原吉等春秋高特賜敕解部務俾專論道而顧問益親寵賚稠疊不可殫述上嘗製玉冠二枚以其一賜原吉曰使卿子孫知吾君臣一體也卒贈特進光祿大夫太師謚忠靖賜祭殯葬皆越常典官其子瑄為尚寶司丞命戶部蠲戶役後官至南京太常少卿孫崇文舉進士為南京吏部郎中皆賢而

有文世其家

夏瑄

見上

易先

詳忠臣志

彭謙湘陰人永樂丙戌進士巡按四川有豪右置私
獄錮人又有僧掘地匿婦女謙廉得之悉按以法尋
以四川左參議致政有詩文行世

見舊通志

曹弘明一統志字文淵益陽人永樂乙未進士授刑
部主事尋陞員外郎恭慎有聞宣德間進右侍郎巡

撫淮南安靜不煩雖貴顯清苦如寒士

易綸楚紀益陽人宣德中舉於鄉拜監察御史獨立
敢言忤權貴謫教宜川尚書江淵贊曰其進可取卿
相而言動蹇蹇其退可式後學而楷模循循

羅琥明一統志茶陵人正統時為南陽別駕積粟麥
三十萬石撫綏流民萬餘戶築封丘隄八十餘里陞
知衡州府以擒賊功進南京戶部郎中攝部事諸司
咸祇令焉

劉憲明一統志字廷試益陽人成化戊戌進士拜監察御史巡撫寧夏召募精銳奏捷花馬池賜金帛後忤逆瑾逮繫詔獄卒

羅安楚紀益陽人成化戊戌進士授戶部主事出補屯田僉事歷貴州叅政遇事多所建明備兵瀘州功績尤偉

羅鑒楚紀茶陵人成化戊戌進士授南京刑科給事中起復補戶科弘治初疏上隆輔養保初政廣儲積

三事出為廣東叅議歷四川布政使均賦役練戎政
撫孤獨不為赫赫名而人被實惠擢副都御史以忤
劉瑾罷瑾誅起巡撫以病致仕年九十卒

黃寶何孟春集字廷用世為長沙鉅族寶隨父官閩
中方成童緝學著文迴絕時輩成化甲辰舉進士觀
政戶部承檄餉銀寧夏當道聞其操守選授吏部驗
封主事謹厚純約一命即精吏職遷員外郎進郎中
惟清惟慎寶不愛寶之言傳播胥隸尋升太常少卿

轉右通政正德丁卯遷應天府尹除苛剔蠹條教一新畿民時苦旱災連歲入萬餘寶節縮出納通融補助公私兩濟用薦為右副都御史巡撫陝西至鎮宣上德諏民隱舉軍法飭邊備西安大旱出令有司減釋囚滯祈禱神祠雨應時浹注漢中賊蠹起聲勢甚熾寶分兵擒捕多所斬獲餘黨就撫秦地以寧會閭瑾擅權或勸通賂遺不答以是忤瑾懼及禍委政去瑾敗言官交章薦仕巡撫月餘旨從中出令致仕世廟

嗣統召為吏部左侍郎卒賜祭葬子恩廕

劉端

詳孝子志

易舒誥姓譜攸縣人弘治乙丑進士選庶吉士授檢討詞翰為時所重逆瑾怙威人皆爭附之舒誥不屈改南京戶部主事瑾敗復入翰林以親老歸養家居十四年杜門却掃娛親之餘雅善吟咏著有西泉集徐廷用楚紀字良佐醴陵人弘治癸丑進士任戶部主事督郝城商稅通州倉儲及內監諸場芻秣事風

夜勤勩力拒請托甲子都御史閻仰宇住理宣大邊
儲廷用督餉以從悉力區畫令不煩而事集還員外
郎所著有東曹奏議

周采明一統志寧鄉人嘉靖己丑進士歷禮科都給
事中端雅沉毅敷奏裕持大體出補參政歷四川左
布政使踰六年進副都御史巡撫雲南以鎮靜得民
李崇李幼滋李崇碑字世叔長沙人初領鄉薦適父
病亟請於天以身代不得哀毀廬墓父遺卷千金焚

之中嘉靖戊戌進士歸取古今書閉戶讀之且十年
始出拜禮部主事累遷太常少卿都察院右僉都御
史兩廣山寇煽亂陞副都御史鎮撫南贛汀韶等處節
制四省上安邊六策先定謀而後戰摧劇賊殄滅之
地方底寧轉南京兵部右侍郎仍躬歷要害處設防
守以善後圖去之日男婦襁負遮道士民建祠以祀
尋轉南京吏部右侍郎乞歸卒賜祭葬

鄧巍瀏陽人嘉靖辛丑進士任溧水令擢南考功叅

歷郡守藩臬皆以清異著稱因與張居正為舊交務
自遠嫌終不究用年八十五卒

見舊通志

周之屏三楚文獻錄湘潭人嘉靖己未進士授溧水
令陞知吉安府屬有流賊之警偕浙兵捍禦兵素暴
與郡人睚眦叫譴入府門皆露刃僚吏散走之屏嚴
鼓升堂諭以禍福皆投刃拜一郡獲安擢廣西布政
使張居正議欲大量守令言搖犇田不可問比入覲
合言於朝張厲聲云只管丈之屏遽揖而出守令或

問故之屏曰相公方欲整齊法度肯明言田不可丈
耶伸縮在我輩耳弟之翰嘉靖己卯舉人歷四川僉
事之基萬厯癸未進士歷邵武太守並祀鄉賢

周之翰

見上

周之基

見上

譚希思茶陵人萬厯甲戌進士初任萬安縣調金永
豐皆有惠政擢南畿御史抗疏六事降謫復內擢歷
陞順天府丞晉僉都御史巡撫四川時播州逆節方

萌廷議主勦希思主撫遂去職居鄉以清介稱
莊天合長沙衛人萬厯己丑進士改庶吉士授編
修侍講筵晉宮僚以端謹受知於光宗庚子主試南
都甲辰分校禮闈所拔多知名士累進少詹事丁外
艱歸卒贈禮部右侍郎賜祭葬子以臨廕授中書舍
人以上舊通志

李騰芳湘潭人萬厯壬辰進士改庶吉士授編修好
學負才名三王並封旨下騰芳為書詣朝堂投大學

士王錫爵錫爵懽然遂反並封之詔朝鮮復用兵上
安攘八策累遷左諭德光宗立擢少詹事旋拜禮部
侍郎尋改吏部加禮部尚書魏忠賢惡騰芳與楊漣
同鄉矯旨削奪懷宗起掌部事卒贈太子太保

明史稿

劉弘化長沙衛人萬厯庚戌進士兩令山西以循卓
稱擢刑科給事糾輔臣附權宦內臣僭批答及移宮
紅丸兩案皆人所難言魏璫屢興大獄具疏力爭熊
廷弼方擬大辟弘化復以公揭保之璫誣以受熊賄

萬金按追寔甚璫敗仍以兵科給事晉太常卿轉南
大理旋告病歸請減長沙府例外派銀五千餘兩潭
人至今懷之

見舊通志

洪雲蒸

詳忠臣志

羅喻義益陽人萬厯癸丑進士改庶吉士授檢討天
啟初累遷南京國子祭酒諸生欲為魏璫忠賢建祠
喻義懲其倡者乃已忠賢黨輯東林籍貫湖廣二十
人以喻義為首懷宗嗣位召拜禮部侍郎克日講官

喻義見中外多故將吏不習兵銳意武事因言武有
七德豐財居一明年進講尚書撰布昭聖武講義中
及時事語侵執政喻義雅負時望為溫體仁所傾卒

諡文介

明史稿

周耀冕寧鄉人萬厯己卯鄉薦任東平知州陞延安
同知築加水之隄以扞黃河搗廊崖之巢以靖邊圉

見府志

謝肇元湘潭人天啟乙丑進士初知嘉定州請減浮

糧著祥刑錄晉戶部郎別樊釐奸兵餉取給分校蜀
閬典試滇南皆稱得士擢漕濮兵備時值寇警屢捍
危城加大叅進廉使督餉治兵威懷克著卒贈太僕
吳應台湘陰人以進士授浦江令時金華義烏頗有
寇警應台練兵捍禦賊不敢犯境有冤誣兩獄應台
立為昭雪

以上舊通志

陶顯位

詳文苑志

陶汝鼐

詳隱逸志

皇清胡爾愷字石江長沙進士經略洪承疇以山林隱
逸薦特授吏科給事中在諫垣一載章屢上皆中
事窾其言湖南彫敝尤切歷吏部右侍郎遷禮部
左侍郎卧疾尚陳四事平催徵禁營造革夫輜抑
侵漁俱蒙

俞允未幾寓京邸貧無以歛士大夫為經紀其喪以歸
趙開心字靈伯長沙人由進士特授陝西道御史
有鯁直聲

世祖皇帝特重之擢僉都御史晉左都凡值疑獄抗疏剖
析總領臺憲風紀肅然尋降補太常卿復晉工部
尚書兼總督倉場卒於官賜祭葬遣官護喪還里
周應遇字鶴泉善化人以歲貢生佐經畧洪承疇
幕薦補雲南洱海僉事有清譽三載告歸以山水
詩文自娛著友水軒集

以上俱舊通志

彭之壽寧鄉人康熙四十年以貢選南漳縣訓導
閱五年告歸之壽篤勤於學善引掖後進及門登

仕籍者多良吏族黨貧乏者傾貲顧卹未嘗有德色

曹景星

詳義士志

衡州府

明陳翔鄴人成化癸卯領鄉薦授翰林院博士出知普安州州苗民雜處守下車例有餽遺翔力却之遂歡服後家居故人有孤女無所依翔撫育厚嫁遣之

見舊通志

劉泰鄆人太學生歷嘉善合肥丞擢東阿令不赴歸
與邑人講學多所造就任嘉善時督郡課十餘萬例
有羨金泰悉罷却請以充明歲正供有旨旌賞合肥
有巨鎮泰請築城又立社學民深德之

見舊通志

蔣福陵明一統志衡陽人正德甲戌進士初令鄞政
尚豈弟催科不擾擢太僕寺丞出知杭州府公廉寬
裕始終一節

劉黻明一統志衡陽人正德丁丑進士授行人諫武

宗南巡謫南京國子助教嘉靖初復職尋擢御史屢
建危言宜戚斂手出按四川禁中貴專擅復蘇氏侵
田以終養告歸

劉堯誨三楚文獻錄字君訥臨武人為人沉毅寡言
登嘉靖癸丑進士令新喻擢南刑垣適倭勢且薄畿
甸堯誨抗疏論總制胡宗憲失策謂功罪不明賞罰
惟貸天下事大可憂者疏入分宜銜之又浙直以備
倭故凡均徭銀俱先三年辦名曰提編法民困甚堯

誨抗疏巧取民不如拙省費罷興作省冗兵內外供
應尚衣寺人多冒破宜裁核權貴人皆側目因引疾
歸粵寇犯臨武率子弟禦之又募父家兵為外援從
間奪賊所豎旗賊驚引去起為僉都御史撫八閩設
方畧殲巨寇林鳳黨並擒倭梁麻哩諸衆又奏設南
澳總兵扼斷賊巢進副都御史再撫江西疏蠲積年
逋餉二十九萬零擢少司馬兼御史中丞督師兩廣
諸將士以縱賊林道乾伏法堯誨言法不及文寢非

所以示公竟按海防官不少貸於是流賊相繼輸款
又定羅旁兩猺狼調土兵定粵西八寨酌善後七策
又條畫粵西鹽法使湖南民不苦鹽嶺東兵不苦餉
陟南戶兵兩部尚書予告歸所著有督撫奏議治河
三議虛籟集臨武志

朱炳如衡陽人嘉靖己未進士官行人奉使藩府餽
遺無所受晉御史視鹺淮南庫積贖鍰三萬兩牒漕
司以佐邊備賑得代出境行笥惟圖書故衣巡粵西

典試事稱得人及經畧諸山岩撫勸事宜並中窾要
出守泉州單騎赴任一老蒼頭相隨政暇延諸生談
道藝泉故有河通城中如卦畫環學官歲淤久且盡
炳如濬之明年庚午鄉試泉預解額者五十八人京
闈闈兩解首皆泉人僉謂濬河之應轉兩浙運使入
覲署上考為天下治行第一賜金綺尚方食累陞陝
西左布政使清操始終有詩文集若干卷炳如尤有
德於泉郡士建祠祀之比西山梅溪云

見舊通志

曾朝節臨武人萬厯丁丑進士殿試第三人及第歷
官禮部侍郎掌詹事經筵講官晉禮部尚書先後疏
請遠食壬忍嗜好修人紀勵精政治凡十上累數千
言上嘉納之充東宮講讀每因事導引必歸於道上
嘗顧謂太子此汝社稷臣也疾卒上震悼諭祭葬贈
太子太保諡文恪朝節廉靜雖踐華要而貲產未嘗
有餘嘗構會館於京師為湖南士大夫邸舍又於郡
北建來雁塔以砥湘流置義田贍子姓立朝忠藎病

劇猶手著釋解典觀全史以進所著有紫園草南國
草易測書經正旨以弟朝符子廷棟為嗣廕補上林

苑監丞

見舊通志

伍廷相衡陽貢生事繼母孝能文章入南雍上安民

定亂十三策有旨報聞

見府志

謝如珂

詳義士志

歐陽顯宇

詳忠臣志

甯咸

詳文苑志

王萬善

詳文苑志

聶廷鳳

詳義士志

皇清曹國光未陽歲貢生博學有品見鄉人爭輒往平
莊墅杉千株為隣火延燒殆盡隣人願償光慰遣
之其長者行類如此年九十六卒

周士儼字若思衡陽人順治甲午貢入成均屢試
拔萃選授內閣中書舍人陞典籍以書勅偶誤鐫
級御史李之芳疏論其枉奉

昔赴部具訊本末士儼終不自明引罪如初少宰王清
與大中丞高珩嘉之謂此一官者誠不怨不尤之
君子也照所鐫級補國子學正量移工部司務檢
括舊皇莊之隱漏以佐軍興兩計皆書上考以疾

卒官

以上舊通志

永州府

東漢鄭產水經注零陵先賢傳曰鄭產字景載泉陵
人也為白土嗇夫漢末多事國用不足產子一歲輒

出口錢民多不舉子產乃勅民勿得殺子口錢當自
代出產言其郡縣為表上言錢得除更名白土為更
生鄉也

蜀漢劉巴蜀志列傳巴字子初零陵烝陽人少知名
荊州牧劉表連辟及舉茂才皆不就表卒巴北詣曹
公曹公辟為掾使招納長沙零陵桂陽會先主畧有
三郡巴遂遠適交趾復至蜀先主定益州巴辭謝罪
負先主不責而諸葛孔明數稱薦之辟為左將軍西

曹掾後代法正為尚書令躬履清儉不治產業恭默
守靜退無私交非公事不言先主稱尊號文詰策命
皆巴所作章武二年卒按劉巴傳注零陵先賢傳曰
巴祖父曜蒼梧太守父祥江夏太守盪寇將軍明一
統志以巴為劉優長子繆也又以劉敏為優孫不知
何據

黃蓋吳志列傳蓋字公覆泉陵人初為郡吏察孝廉
辟公府孫堅舉義兵蓋從之拜別部司馬堅薨蓋隨

策及權擢甲周旋諸山越不賓有寇難之縣輒用
蓋為守長石城縣吏特難檢御蓋乃署兩掾分主諸
曹教曰兩掾所署事入諾出若有姦欺終不加以鞭
杖宜各盡心無為衆先久之蓋時有所省各得兩掾
不奉法數事乃悉請諸掾吏賜酒食因出事詰問兩
掾辭屈皆叩頭謝罪蓋曰前已相勅終不以鞭杖相
加非相屈也遂教之縣中震慄遷丹陽尉抑強扶弱
山越懷附蓋姿貌嚴毅善於養衆每所征討士卒皆

爭為先建安中隨周瑜拒曹公於赤壁建策火攻拜
武鋒中郎將加偏將軍病卒於官蓋當官決斷事無
留滯國人思之及權踐阼追論其功賜子柄爵關內
侯

晉葉譚楚紀泉陵人清簡有節操至洛陽舉孝廉除
郎中拜太子舍人遷秘書監

唐屈隱之姓譜祁陽人少好經史尤精莊易舉秀才
為廣州判官兼攝司馬遷韶州刺史居官清儉請託

不行

李邵延唐人唐書劉蕡傳太和二年舉賢良方正能直言敢諫引諸儒百人於廷時第策官見蕡對嗟伏而畏中官眄睚不敢取河南府叅軍事李邵曰蕡逐我留吾顏其厚耶乃上疏曰陛下御正殿求真言使人得自奮今蕡所對敢空臆盡言有司以言涉訐忤不敢聞自詔書下萬口藉藉歎其誠鯁至於垂泣臣所對不及蕡遠甚內懷愧恥自謂賢良奈人言何乞

回臣所受以旌黃直帝不納邵後歷賀州刺史

五代何仲舉

詳文苑志

采陶岳楚紀祁陽人太平興國五年進士累官太常
博士知端州余靖過端父老言前後刺史不求覲者
惟包孝肅及岳二人歷官四十餘年五為郡守有文
集行世

周輔成明一統志道州人世居營道之瀟溪登大中
祥符八年進士歷官多善政終於桂陽令累贈諫議

大夫子敦頤

周堯卿宋史列傳堯卿字子俞道州永明人天聖二年舉進士積官至太常博士范仲淹薦其經行可為師表未及用始堯卿年十二喪父憂戚如成人見母則抑情忍哀不欲傷其意母知而異之謂族人曰是兒愛我如此多知孝養矣及母喪倚廬三年席薪枕塊雖疾病不飲酒食肉既葬慈烏百數銜土集隴上人以為孝感所致為學不專於傳注問辨思索以通

為期長於毛鄭詩及左氏春秋有詩春秋說各三十卷文集二十卷子論鼎州司理參軍詵歸安主簿何璽姓譚營道人登政和八年進士性剛介議論不屈倅隨守廉俱擅聲稱後守雅州亦以最聞

陳邁

許忠臣志

歐陽言楚紀營道人建炎二年登第性廉退任遷江令嘗獲冒爵人陳椿以賞合改秩固辭不受後宰劇邑鞫制獄愈有聲稱尋倅賓陽遷員外郎致仕故廬蕭然

唐開楚紀江華人建炎二年第進士通判廉州治績著稱於時叔父貢常被誣憤死於獄開詣京師訴寃鄉人高其義

李長庚明一統志寧遠人登紹興二年第歷仕五十年廉潔有守不事生業惟蓄書數千卷號其讀書之室曰冰壺卒年八十有六有冰壺集

樂雷發字聲遠寧遠人少穎敏無書不讀長於詩賦累舉不第門人姚勉登科以讓第疏上理宗發策親

試對選舉八事稱旨賜特科狀元因數議時事不用

歸隱雪磯

見舊通志

義太初

詳文苑志

唐傑

詳孝子志

李文珍

詳孝子志

明周爨永明人好學善屬文永樂乙未進士初授行人奉使交趾還知雷州府起復補瓊州政尚嚴明而

宅心仁恕兩郡懷德

見舊通志

雷復寧遠人正統初進士由庶吉士歷官廣西副使
藤縣奸民搆徭陷縣治與叅將范信討斬之成化初
以大臣會薦擢山東右布政司七年徵拜禮部右侍
郎尋改右副都御史巡撫山西端恪守法得軍民心
敗寇紅沙煙再敗之煙寺溝石人村賜勅獎勞時山
西大侵廷議以陝西用兵令預徵芻餉轉輸榆林復
上言自山西至榆林道路險絕民齎銀往易價翔貴
不免稱貸償責多破產今雨雪愆違飢民疾病流離

困悴萬狀而應輸綾帛藥果諸物又不下萬計乞
依山東例蠲除仍發帑賑贍帝從之及發金三萬不
足請鬻鹽四十萬引並令民入粟授散官皆報可

明史

稿

甯良明一統志祁陽人賦性伉爽好學能文章正統
乙丑進士授行人歷官浙江布政使所至有聲績

吳裡明一統志零陵人成化丙戌進士任監察御史
振肅風紀茂著激揚之聲陞參議參政克修厥職不

畏權勢

熊繡道州人成化二年進士授行人奉使楚府巡查
四川力拒餽遺擢御史巡按陝西發布政于瑞罪帝
怒下繡吏謫知清豐久之擢鳳翔知府弘治初遷山
東左叅政進右布政使七年以右副都御史巡按延
綏初榆林屯兵備冬為小堡景泰中始移巡撫總兵
官居之遂為西北巨鎮城隘弗能容乃徙千數百家
於城外繡請增築千二百餘丈浹鎮數年練兵積累

邊政修舉歷兵部左右侍郎尚書劉大夏深倚信之
騰驤四衛勇士額三四萬人率虛籍命繡清釐得詭
冒者萬四千人時武宗初立御馬太監甯瑾欲遠之
乃擢右都御史總督兩廣既抵鎮盡裁幕府供億討
平賀縣獍瑾深疾繡召掌南京都察院事尋罷歸卒
巡撫秦金頌其清節於朝贈刑部尚書太僕少卿何
孟春乞予謚遂謚莊簡並給其孫月米一石

明史稿

周璇字玉衡東安人成化丁酉舉人令武平值賊猖

獮璇單騎詣巢推誠曉譬賊黨遂服兵荒相繼璇勤於撫字以最調柳城歸卒年八十七

見舊通志

周鵬楚紀永明人成化戊戌進士授刑部主事讞獄多所平反出守潮州築三利溪隄溉民田數千頃陞雲南參政卒家無餘儲

程溫明一統志祁陽人由進士任南京吏部主事陞南京通政司叅議逆瑾用事舊輔劉健謝遷皆罷溫草疏將應求直言詔書忽內批致仕歸里家多藏書

悉出送黷舍中嘉惠後學云

何天衢楚紀字道亨營道人游濂溪月巖山深悟先天之學久之有得中弘治丙辰進士授嘉興令秩滿拜監察御史彈劾無徇避巡諸邊鎮書伺風角宵察景緯靜籌樽俎動謹斥堠逆瑾用事達官貴人多出門下天衢恥之遂遭廢銅瑾敗起守河南鎮守太監索七郡重貨獨抗弗與遷陝西副使燭機防變申律令作士氣秦人賴有寧宇轉浙江按察使晉布政使

浙湖孽族為亂天衢兼撫勦平之宸濠不軌貴璫畢
正潛為應天衢夙有成算正授首頒賞有差嘉靖紀
元擢都御史巡視河南鑛徒為寇衆十數萬天衢克
之晉工部右侍郎增祿一品留守南都值日精門災
疏陳時政闕失上嘉納遷理易州厰卒愍綸子卹子
啟始四歲乃蔭其弟天衡

歐陽光永明人弘治己未進士令長洲調永新不善
媚權貴遂絕意仕進徜徉林壑垂十餘年

見舊通志

胡節楚紀零陵人弘治壬戌進士授行人拜監察御史按山東忤逆瑾逮繫詔獄卒贈光祿少卿

朱袞楚紀永州人弘治壬戌進士選翰林院庶吉士拜監察御史以忤逆瑾謫縣丞瑾敗起擢南京吏部郎中出補雲南叅議轉按察副使進叅政為人樸茂善談論如湧泉懸河為文颺回峯豎人莫能測其底蘊

沈良佐明一統志零陵人正德戊辰進士任南京戶

部主事歷廣西左叅政立心忠厚行事光明凡所至皆有治績

陳薦祁陽人隆慶辛未進士選御史巡按陝西時三秦荒旱薦清贖醵得四萬餘金疏請蠲賑全活者甚衆歷巡撫滇南操江留都皆有惠政晉工部尚書總督漕運至吏部尚書卒年八十餘著古今衷辨百餘卷

周希聖零陵人萬曆己丑進士令華陽舊有宮扇之

供大為民困希聖出俸錢佐之猶不給為之不食而
泣秩滿擢山東道御史會有倍取宮扇之旨遂抗疏
極言之謫灌陽典史以薦起太常丞陞南京戶部尚
書魏忠賢用事有訐希聖與楊漣深交者忠賢遂矯
旨奪職忠賢敗復起用希聖辭年八十五卒於家
以上舊通志

唐德明

詳忠臣志

陳純德

詳忠臣志

文明

詳文苑志

唐斌

詳義士志

楊成章

詳孝子志

盧奇

詳義士志

寶慶府

晉周崎

詳忠臣志

唐胡曾姓譜邵陽人天福間屢舉不第高駢鎮蜀引
為從事時南詔叛辭語不遜駢命曾撰牒諭之曰四

方之於中國猶衆星之拱北辰百川之趨東海天地
尚不能違況於人乎南詔屈服乞和尋補寧遠令多
惠政徙延唐請於朝復建舜祠著有安定集十二卷
詠史詩百首

宋周儀楚紀武岡人雍熙初舉進士官至諫議大夫
為嘉祐直臣居家以邵陵田悉分結宗族子湛天禧
中進士

王元春姓譜邵陽人慶元中進士初為零陵令創建

學宮置義產治多善蹟歷官吏部侍郎卓有清聲

明梁德遠

詳孝子志

劉敬楚紀武岡州人永樂辛丑進士由縣令擢御史遷山東副使練軍實核饟餉抑豪右不以夷險渝操罷免家居再起為都御史未赴而卒

袁寧新化人正德丁卯舉於鄉任晉安知州土官構害地方寧下車却其餽遺遂受約束普民德焉歸田後杜門掃軌自娛山水間

見舊通志

楊廷芳楚紀邵陽人天順庚辰進士授南京評事轉
寺正多所平反仕至貴州僉事以疾歸講學於邑之
東山號東山先生年九十八吟誦不輟人稱其年近
百齡學長三絕

黃疏武岡州人天順己卯鄉舉任吏部司務性敏練
有守陞刑部員外郎雪冤甚衆

伍佐新化人弘治己酉鄉舉任河南府通判遷安寧
知州州民多寄戶影射徭役佐編籍申白宿弊頓除

轉贛州同知屬龍南寇警佐連搗山巢俘馘有功陞
思南知府勸農桑修學校以目疾乞休為人廉介恬
退所著有文峯集

以上舊通志

康憲邵陽人明一統志幼孤事母雷曲盡其孝弘治
中以歲貢任廣元知縣嘉惠學校寬恤小民蠲串錢
之弊代通乏之征九載歸田恂恂謹厚人有非義愧
不以聞治家有法尤敦姻睦卒年八十四

唐鳳儀明一統志邵陽人正德戊辰進士授行人拜

監察御史出按蘇松再按浙江釋疑獄表忠節禁奢
侈風紀肅然擢應天府丞進食都御史巡撫四川值
歲大饑疏請賑濟全活無筭芒部跳梁時議征勦溽
暑出師鳳儀疏請息兵計擒沙保蜀人大悅陞左副
都御史母艱歸卒賜祭葬蔭一子

李中憲新寧人正德間以貢士任廣元令興學校卹
斃獨飭軍衛賢聲茂著乞歸之日行李蕭然卒年九
十有五

楊和城步人以歲貢任梧州通判清稅課捕劇盜改
判潯州督勦有功遷劍州知州州隣麗江土官奪民
田嚴諭還之和性剛而愛民劍州人有竹溪遺愛集
紀和善政

曹一夔武岡州人萬厯甲戌進士授行人擢監察御
史巡長蘆山東鹽法條陳十二事著為令甲再巡四
川轉嘉湖兵備洗冤釐弊以激揚清濁為先乞養親
歸卒所著有虛白堂集

車大任邵陽人萬厯庚辰進士令南豐遇事敢為時
流寇亂後戶多逃亡邑民供廢田之稅大任力言於
上官請聽民就便近買給得奏允行且符下他縣如
大任請因遂蘇陞禮部郎中出守福州時日本叛擾
東南多警乃練軍實繕城隍首行常平社倉之法叙
賚特優擢嘉湖兵備副使創建仁文書院遷巡溫處
參政以養親告歸所著有螢囊閣正續集四十卷喻

言六卷

劉應龍邵陽人萬厯間進士初令崑山以清簡理獄
以精明摘奸裁運軍糧羨勤學校課試士民感悅行
取擢御史奏減蘇州糧數萬石蘇人為之立祠出按
山西福建復按畿輔捐俸賑飢還南京太常少卿告
歸應龍尤深究性命之旨所著一得編傳於世

王尚賢邵陽人父歿事繼母盡孝以大父遺產讓其
從弟領萬厯甲午鄉薦授將樂令革坊里陋規汰絕
軍冒食改補蒼梧權稅無分釐溢額商旅賴之會派

宗藩贍產尚賢按得軍田冒占者如數克之免奪民
田數千畝晉蘇州同知署長吳二縣篆撫武進亂民
擒丹陽劇盜置官田蘇漕累理冤獄尤以清節著聞
所著有萊園集二十餘卷

陳九鶴邵陽人萬厯己酉舉鄉薦孝友醇謹值歲歉
鬻產市米為淖糜數處人賴全活晚令嘉禾邑小而
殘撫綏煦育民賴保聚未幾告歸析田產之半以贍
兄弟之子

以上舊通志

劉孔暉

詳忠臣志

盧大受

詳忠臣志

古觀詳

孝子志

王朝卿

詳孝子志

車大敬

詳義士志

簡而廉

詳孝子志

岳州府

明方昇明一統志臨湘人鄉薦第一舉進士性寧靜

有文行拜監察御史按治處咸著清直聲遷江西副使卒官篋中惟衣服二三襲士大夫賢而惜之

劉綸臨湘人成化己酉舉人資性剛方知四川灌縣豈弟得民秩滿士民請於當道願借一年及歸民涕泣追送祀名宦

方賓巴陵人弘治鄉貢性方嚴不苟言笑以義訓厲族人終其世族無爭訟者正德間任鳳陽通判值山東盜起督兵禦淮建靈壁虹縣二城賊至不得渡縱

擊大破之御史上平賊績詔旌異卒於任子啟泰河
東都轉運使啟念劍州知州

方鈍巴陵人正德辛巳進士累官戶部尚書時邊費
浩繁苦心調給六載所上章疏至數十萬言受知世
廟立朝正直忤權貴請假回籍築白荆楓橋二隄穆
皇即位遣官存問卒贈太子少保謚簡肅

余坤巴陵人正德己卯舉人官監察御史奉使四川
招撫流民數萬坤為人廉正尤以孝著有月田漫稿

姜廷頤巴陵人嘉靖甲辰進士授餘干令擢御史遷
淮陽兵備副使是時取民無制江北尤甚廷頤計郡
邑公費歲若干籍記之按籍征輸為條編法自是大
江以兩浙左右湖南北漸次舉行遂徧京省美意良
法實自廷頤始之累官至兵部侍郎予告歸

白竹華容人萬厯庚戌進士官至建昌守以廉著改
補瓊州遷粵東提學建昌瓊州並祀名宦

以上舊通志

楊一位

詳孝子志

楊紹儒

詳義士志

沈植

詳義士志

常德府

宋管師復

詳隱逸志

明馮貴

詳忠臣志

鄧崙明一統志武陵人永樂甲辰進士歷兵科給事

中上疏選將帥練士卒汰冗官犒邊軍去積弊謹失

機禁侵漁嚴紀律貸貧匠徙達官凡十事坐忤出補

長蘆運使建議鹽課利害十餘事民商便之

文澍姓譚桃源人成化丙戌進士歷南京刑部郎中
知重慶府政尚寬平有古循吏風值歲飢請米萬石
以賑全活甚衆有劇盜嘯聚山澤諭之使復業盜感
其誠信即解散澍富於學問為詩丈古澹有思致年
躋耄耋手不釋卷居鄉以禮法自律人稱篤行云

楊褫明一統志武陵人弘治壬子解元丙辰進士選
庶吉士歷刑禮兵吏科都給事中持正敢言忤逆瑾

致仕瑾敗起吏科轉通政晉南京太僕寺卿有疏稿
詩文行世

陳洪謨楚紀武陵人弘治丙辰進士授刑部主事累
官雲南布政使值習阿苗亂與都御史何孟春協心
調度督餉濟兵克平十八寨晉都御史巡撫江西修
廢政汰冗員纂輿志召入為兵部侍郎掌部事運籌
邊政益勵清操卒贈兵部尚書賜祭葬所著有靜
芳亭稿

龍琰武陵人正德戊辰進士令上饒改長樂以勤慎
為政徵為刑部主事能循法守

龍翔霄武陵人正德己卯鄉舉任閬中令轉知程番
府督建黔城能均勞逸恤夫役六年考滿晉中憲大
夫仍留三年竣城工任黔既久士民感德為立祠以祀
陳仲錄武陵人嘉靖癸未進士令新城有廖氏兄弟
爭訟十年仲錄取手足共械出入與居閱月感悟情
好如初葬骨數百棺歷刑曹益多平反除山東按察

使告歸

胡舜華武陵人嘉靖庚戌進士令興化禦倭有功歷官布政司叅議奉旨籍嚴嵩貲財一無所染家素貧所得俸置義田以贍族無私利焉

龍德孚翔霄季子嘉靖戊午鄉舉授衛輝司理首復白泉書院均屬縣徭役陞寧波府同知官族奴僕倚勢為暴悉置諸法轉戶部郎中督權淮南以清白著謝事歸里長詩文書法著對湘樓集德孚昆季四人

並列薦紳子三人襄孝廉負才名膺官太常京國學
皆風雅夙譽家門華顯云

陳思育武陵人嘉靖乙丑進士選庶吉士授翰林院
檢討與新安許國石首王喬桂切劘為古詩允經筵
講官轉贊善主應天試旨錄無錫顧憲成一時稱得
士世廟實錄成陞中允大婚禮成進諭德主順天試
陞少詹纂修會典拜禮部侍郎致仕神宗念其講筵
功多賜馳驛歸

龍膺德字之子萬厯庚辰進士陞徽州府推官有清操遷祠祭司主事歷陞甘肅叅政以宿望召入為太常卿

江盈科桃源人少甘貧推祖父所遺田以與昆弟授徒自給除夕自郡歸道逢失金赴水者傾所携贈之得不死萬厯壬辰成進士授長州令縣苦京解諸役盈科為置役田二千餘畝以資役費比賦勾校每寬其撲曰吾不忍見傷肌膚之效也秩滿遷吏部考功

主事改大理寺正恤刑滇黔全活甚衆主試蜀中擢
提學僉事卒

胡永順武陵人萬曆丙辰進士任太平推官擢兵科
給事直言敢諫疏劾時宰張鼎督臣張我師黔帥張
鳴鶴朝野震悚彈魏璫為城狐社鼠御批具見忠愛
然宵小側目旋告病歸懷宗立遷禮科都給事卒

以

上舊通志

唐景

詳義士志

皇清楊震生武陵人以選貢授漳平知縣操守清白有
治劇才民有積逋繫獄與設方計使得償而出之
鎮兵據民產請逐兵而還民陞知德州

胡統虞武陵人前明進士選庶吉士陞檢討順治
初

詔授國史院檢討典直隸鄉試稱得人擢國子監祭酒
講學彞倫堂以明善誠身為要陞秘書院學士纂
修實錄教習庶吉士以疾終宦橐蕭然門下士為

助葬

丁學顯武陵人事母以孝聞順治辛卯登賢書任阜城令治劇有才兼攝景州士民頌其清操

陳維國常德衛人順治壬辰進士任陽信知縣致仕歸家無宿舛讀書好古工詩文年七十餘卒

劉昌臣常德衛人順治乙未進士初任刑曹恤刑正定有孕婦冤禁洗釋之陞按察僉事提學山東雅意作人每按試必引諸生羅立案側揭經義疏

及為文法度口講指畫不少倦轉浙江糧儲叅議
大兵入閩躬督運餉至嚴會土賊竊發留籌畫
賊遂平一時有兼資文武之稱卒於官

石鯨武陵人順治戊戌進士家貧力學博聞強記

授知灤州廉介有治聲

以上舊通志

劉體安武陵人制行篤實以歲貢生為黃陂訓導
著祀典輯要其言禮器樂舞之制甚詳改補茶陵
值草賊陳丹為亂體安唾賊大罵遂自刎不殊賊

適復甦

羅人琮字宗玉其鼎之子也第順治辛丑進士授
寧波府推官裁闕改朝邑令邑俗輕悍蠹胥莠民
悉繩以法而煦育其柔良有神君慈母之頌行取
擢四川道監察御史知無不言其所陳禁重耗策
備荒勵風節立勸懲籌鼓鑄薦舉人才纂修前史
諸疏頻奉

俞旨尋告歸人琮篤於內行侍親疾衣不解帶者積旬

遭流寇亂兄弟四人逃避相失人琮膚皸足跣遍
行求之不獲白首追憶猶嗚咽流涕年九十卒

文鵠桃源人聰穎博學少時以試義通五經補諸
生老得歲薦司鐸永興課士一以道義多所造就
以子志鯨貴贈朝議大夫

辰州府

宋向正

詳忠臣志

明劉有年楚紀沅州人元季自廬陵徙居洪武中以

明經薦拜監察御史尋以辭秩養母罰通州輸站役
偶從舊家得儀禮逸經十八篇上之上命付史館建
文中起知太平府抑橫軍革黠胥去淫祀釐蠹政以
儒術潤色吏治當塗人士多懷之靖難時以不迎駕
謫戍雲南後平交趾起為按察司僉事卒於官

李景誠辰州人永樂戊子鄉薦任延平府同知平賊

有功居鄉行事可法

見舊通志

蕭璆明一統志辰州衛人嘉靖癸未進士有才華精

文翰家賁克自振勵授吏部主事擢貴州提學僉事
教第嚴正乞休歸日與門人論學不倦

唐愈賢明一統志沅陵人嘉靖丙戌進士知寧海縣
政教兼舉擢御史疏劾奸黨抗言時政遂乞休歸

滿朝薦

詳忠臣志

馮元吉

詳文苑志

鄧顯芳

詳孝子志

直隸澧州

明張浩澧州人景泰進士任工科給事中澧舊有運
京白糧民苦之浩為奏免鄉人至今頌焉後從征交
趾紀功還卒

龔天申澧州人嘉靖舉人萬厯初為嚴州同知民有
兄弟爭產訟十年不止者責令相拜於堂後月餘復
有兄弟訟而兩人為和解則前爭產兄弟也改補充
州開永濟新河便漕運受上方殊賞充州祀名宦子
鐔舉鄉試孫之產萬厯庚戌進士之安以鄉舉為蜀

令死獻賊之難

以上舊通志

皇清張舜齡

詳孝子志

直隸郴州

唐劉瞻唐書列傳瞻字幾之其先出彭城徙桂陽舉
進士博學宏詞皆中累遷翰林學士進承旨咸通中
以中書侍郎同中書門下平章事同昌公主薨懿宗
捕太醫韓紹宗等送詔獄瞻上疏固爭即日賜罷俄
斥廉州刺史貶驪州司戶參軍僖宗立復拜中書侍

郎平章事贍為人廉約所得俸以其餘濟親舊之窶
困者家不留儲無第舍四方饋獻不及門行已終始
完潔弟助字元德性仁孝幼時與諸兄游至食飲取
最下者及長能文辭喜黃老言年二十卒

孟瑄

詳文苑志

宋曹靖楚紀郴人性孝友嘉祐中為益陽令有善政
去後民思累官尚書比部郎知賓州黃庭堅為作善
政頌稱為御史嚴而不殘使民寬而不弛

杜唐卿姓譜字興宗宜春人元豐間進士調浮梁主簿興學校芝生於學從之遊者三百餘人有善政百姓思之後累官司農

朱輅明一統志郴人紹聖間登第通判邵陽累折疑獄人以不寃後知郴獄無一死罪甘露降於州署前松樹逾月松下地猶潤人謂其善政所感

雷應春楚紀字春伯郴人嘉定丙子魁薦又魁禮闈以詩壇名累官監察御史首疏劾時相忤權貴出知

全州不赴隱北湖後知臨江軍安靜不擾嘗欲城新
淦以備不虞當路沮之及已未之亂臨江倉卒無備
始服其先見所著有洞庭玉虹日邊盟鷗清江諸集

陳純夫

詳文苑志

姚宋佐

詳文苑志

曹肅

詳文苑志

黃觀象

詳文苑志

明鄺子輔姓譜耳章人洪武初以明經任本縣訓導

陞安福令不受改句容教諭所在咸立師範謝職教
子楚成進士歷官陝西按察使嘗以俸錢易絨褐歸
奉子輔大怒封還以書責之楚欲相見與僚友謀請
為鄉試考官子輔知之復怒責之曰豈有子廉訪而
父典文衡者乎其義方之訓耿耿如是故世稱楚賢
必歸美子輔云

黃茂楚紀桂東人洪武中貢入胄監才識通敏拜應
天府尹修明政事振立紀綱

曹嗣宗楚紀郴州人少有志操建文庚辰進士初授四川達縣令達故宕渠地嗣宗開創官府修六相樓祀唐李嶠劉晏元微之李適之韓滉宋張商英太守嚴峻德以廉能薦擢陝西按察僉事

朱光才明一統志郴州人永樂甲申進士歷官戶部郎中綽有休聲陞陝西布政司叅議

曹璉楚紀永興人宣德己酉舉於鄉初任嘉定州學正儀矩峻整文學鎮暢擢河南提學僉事以身為教

士習丕變時于謙巡撫中州薦之遷陝西按察副使
總理寧夏邊儲陟大理少卿叅贊延綏軍務謝事歸
卒著有裕齋集子佳字存之成化辛丑進士授南京
大理評事補南京按察僉事大學士李東陽序其集
歐陽復楚紀桂陽人景泰辛未進士授兵部主事歷
員外郎出補泉州知府政平刑簡釋囚致雨卒於官
百姓立歐公祠祀之至今有禱輒應大學士彭時記
云

王庭桂

詳忠臣志

何俊明一統志郴州人成化己丑進士任南京戶部主事擢雲南按察司僉事兼督雲貴學政隨俗化導濟之以嚴凡所陶鑄皆中器使著有訥齋稿子說成化庚子鄉試第一辛丑成進士歷刑部員外郎錄囚南畿多所平反擢河南督學食事學政修舉

鄧庠楚紀宜章人成化壬辰進士初授行人拜監察御史疏陳八事上皆嘉納巡按陝西錄囚繫多所減

宥有編戍海者道出宜章見閭表有庠名曰此活我御史公也泣拜而去都勻苗叛所司請勦庠承命往視得苗爭地讐殺狀詣賊巢諭降之遷河南副使歷陞右副都御史巡撫河南劾鎮守太監廖堂弟鵬倚勢害民詔即逮捕陞戶部侍郎晉南尚書卒年七十七

朱守恕楚紀桂陽人父海正統乙丑進士江西按察僉事守恕登成化壬辰進士授涉縣令改修武廉能

剛毅所至有聲擢南御史陞雲南僉事

崔巖明一統志郴州人成化辛丑進士歷戶部郎中
山東江西河南布政使擢左都御史轉南京工部左
侍郎卒巖生平稜峻不苟合居官三十餘年田園如
舊云

曾全姓譜永興人成化丁未進士授戶部主事值星
變抗疏陳四事歸號碧潭居士築室授徒以詩文自
娛

高蔭先姓譜宜章人成化丁未進士授行人奉使朝鮮管伴來迎蔭先曰朝鮮稱王受命天朝王不來迎是與王人抗矣王謝罪來迎後遂為常陞御史發奸摘伏修舉廢墜歷四川叅議卒蔭先燕居如對賓客閨門若官府交友言必信見人患難必使亟拯之

何孟春明列朝詩傳字子元郴州人弘治癸丑進士李東陽異其才擬入史館以父憂罷授兵部職方主事歷郎中補河南參政入為太僕卿以僉都御史巡

撫雲南召為吏部右侍郎世廟即位詔議尊親禮大臣相繼去位孟春率部院臺諫力爭泣諫於左順門上疏上撫慰再四跪泣不起左遷南京工部右侍郎居無何盡斥諸咈議者削籍錮不復用屏居著述有餘冬叙錄行世穆廟初追贈禮部尚書賜謚文簡

范輅明一統志桂陽人正德辛未進士授行人拜監察御史清軍江西忤寧庶人宸濠謫四川宣撫司經歷起擢福建僉事江西副使宸濠謀反輅首撻其樂

工殺之誣繫獄除名事白復起山東副使陝西叅政
輅有氣節歷官有能聲

直隸靖州

明夏必銘綏寧人洪武初以貢任湖州通判在官六
年清操如一催科不擾屢膺獎薦致仕歸以耕讀教
子弟以和敬勸鄉族周恤貧困化導橫逆卒年七十

六見州志

宋以方

詳忠臣志

張儒靖州人嘉靖戊子鄉薦官至兩淮鹽運副使孝友著聞在官清慎

陳宗武靖州人嘉靖甲午鄉薦為任丘令擢守通州時邊警告急宗武勵精竭力料理芻糧以固根本通融買辦以蘇民困嚴緝盜賊以靖地方修建新城以遏外衝清查卒伍以肅軍政一膺欽賞八舉賢能

易鰲會同人名山知縣歷任九年清操特著卒於官

民立祠祀焉

以上舊通志

楊正恒

詳文苑志

馬應乾

詳文苑志

湖廣通志卷五十

欽定四庫全書

湖廣通志卷五十一

人物志

國家教育之澤長矣人文蔚起後先輝映豈不偉哉
惟楚有材自鬻熊始觀射父左史倚相楚之寶繫
焉如聲子之告子木者雖不為楚用然楚產也若
乃瀟溪生營道而二程實產黃陂考亭南軒過化
荆湖皆瀟溪為之倡此蓋理學之宗衣被九州典

型百代其他或學正而德未全字或功著而學趨
異尚似續先儒誠未逮焉以言乎行業則皆卓犖
可觀矣至於詞章慧業訓詁鼎門及一言一行可
采者次之故文苑附焉幽蘭碧澗蕭然自適者又
次之故隱逸附焉

總部

人物 理學

宋周惇頤朱子漁溪先生傳先生名惇實字茂叔避

名改惇頤世居營道父輔成祥符八年進士贈諫議
大夫先生少孤養外家舅氏龍圖閣學士鄭向奏試
授分寧簿為政精密嚴恕務盡道理有獄久不決一
訊立辨為南安軍司理獄有囚法不當死轉運使王
逵欲深治之先生與之辨不聽取告身變之而去曰
殺人以媚人吾不為也逵感悟囚得不死知南昌縣
改太子中書舍人簽書合州判官事轉殿中丞一郡
之事不經先生手吏不敢決民不肯從為廣南東路

轉運判官轉虞部郎中提點刑獄務以洗冤澤物為
已任設施措置未及盡其所為而卒年五十有七所
著太極圖易通數十篇詩十卷先生在南安時年甚
少程公珦知其為學知道也使其子顥頤受學焉程
公二子倡明道學以繼孔孟不傳之緒其源自先生
發之信古好義以名節自砥礪奉己甚約俸祿盡以
周宗族廬山之下有溪焉築室其上名之曰濂溪語
其友潘延之曰異時與子相從於其上咏歌先王之

道足矣豫章黃庭堅稱之曰茂叔人品甚高胸中灑落如光風霽月短於取名而樂於求志薄於徼福而厚於得民菲於奉身而燕及惇嫗陋於希世而尚友千古宋史嘉定十三年賜謚曰元公淳祐元年封汝南伯從祀孔子廟庭二子壽燾燾官至寶文閣待制謹按朱子黃陂二程祠記云天聖中洛人大中大夫程珦初仕為黃陂尉秩滿不能去遂家焉實以明道元年壬申生子顥字伯淳又明年癸酉生子

頤字正叔其後十有餘年當慶厯丙戌丁亥間攝
貳南安乃得獄掾春陵周公與之遊於是二子因
受學焉既乃得孔孟不傳之緒於遺經遂以所學
為諸儒倡今所謂明道先生伊川先生是也河南
府志云程氏中山博野人有諱羽者宋太平興國
間以官貴賜第京師遂家河南羽生希振希振生
適適生珣適為黃陂縣令清謹卒於官珣不能還
遂家於陂生顥頤二子未幾錄用功臣後就注珣

為黃陂尉孝感縣志云適令黃陂時娶於孝感張
氏生珣故二程常遊孝感讀書董湖西北隅今程
子巷即其地又二程遺事明道先生未能言時叔
祖母任氏抱之行不覺釵墜先生以手指示隨所
指得之然則二程誕降之由其生長淵源于楚地
者奚翅數十年且其宗族姻婭咸在匪但流寓而
已世稱河南二夫子前不係中山後不入荆楚原
夫大儒挺出天下宗之非一圉所能私然實未嘗

非楚人也因附識於濂溪之後後之君子庶有考焉又按周程之學集成于朱子宋元間有趙復者默識於兵燹之餘始傳及許魯齋諸人復蓋德安郡人也道學之傳於楚固有厚幸云

總部

人物志 行業

周鬻熊鬻子名熊楚人年九十餘見文王王曰老矣鬻子曰使臣捕獸逐麋已老矣使臣坐策國事尚少

也文王師之著書二十二篇名曰鬻子周封為楚祖
按鬻子壽最高成王時猶存其書今傳十四篇賈誼
新書止述七篇

鬬廉字射師楚大夫左傳桓公九年楚子使道朔將
已客以聘於鄧鄧南鄙鄢人攻而奪之幣楚使鬬廉
帥師及已師圍鄢鄢養甥聘甥帥師救鄢鬬廉衡陳
其師於已師之中以戰而北鄧人逐之背已師而夾
攻之鄧師大敗鄢人宵潰十一年楚屈瑕將盟貳軫

鄖人軍於蒲騷將與隨絞州蓼伐楚師莫敖患之廉
曰君次於郊郢以禦四邑我以銳師宵加於鄖若敗
鄖師四邑必離莫敖曰卜之對曰卜以決疑不疑何
卜遂敗鄖師於蒲騷

關伯比楚大夫能料敵知人左傳桓公六年楚武王侵隨
關伯比言於楚子曰漢東之國隨為大隨張必棄小國
小國離楚之利也少師侈請羸師以張之八年楚子伐
隨隨師敗績獲少師伯比曰天去其疾矣乃盟而還十

年屈瑕伐羅伯比送之還謂其御曰莫敖必敗舉趾
高心不固矣及羅羅與盧戎兩軍之大敗之

虞丘子劉向說苑楚令尹虞丘子嘗薦孫叔敖之賢
莊王以為令尹少焉虞丘子家人干法孫叔敖執而
戮之虞丘子喜入見於王曰臣言孫叔敖可使持國
政奉國法而不黨施刑戮而不骫可謂公平莊王曰
夫子之賜也已

屈重楚莫敖左傳莊公四年楚武王伐隨卒於柢木

之下屈重與令尹鬬祁乃除道梁澁營軍臨隨隨人懼行成莫敖以王命入盟隨侯且請為會於漢汭而還濟漢而後發喪

鬻拳楚大夫左傳鬻拳強諫楚子楚子弗從臨之以兵懼而從之鬻拳曰吾懼君以兵罪莫大焉遂自刎也君子曰鬻拳可謂愛君矣諫以自納於刑刑猶不忘納君於善楚子伐黃還及湫有疾卒鬻拳葬諸夕室亦自殺也而葬於絰皇

為賈叔敖之父為楚工正秉心淵沈而有謀臨事果
敢而能斷遇敵整暇而不迫左傳僖公二十七年子
文用子玉為令尹國老皆賀賈尚幼後至不賀曰子
玉剛而無禮不可以治民後果敗於城濮文公十六
年楚大饑戎及庸人麇人皆將伐楚楚人謀徙於阪
高賈曰不如伐庸彼謂我饑不能師故伐我也若我
出師必懼而歸乃出師滅庸宣公元年晉伐鄭使賈
救之過於北林囚晉解揚

屈完楚大夫左傳僖公四年齊侯以諸侯之師伐楚師進次於陘楚子使屈完如師師退次於召陵齊侯陳諸侯之師與屈完乘而觀之完曰君若以力楚國方城以為城漢水以為池雖衆無所用之遂及諸侯盟

逢伯楚大夫左傳僖公六年楚子圍許許男面縛銜璧大夫袁絰士輿櫬楚子問諸逢伯對曰武王克殷微子啓如是武王親釋其縛受其璧而祓之焚其櫬

禮而命之使復其所楚子從之

潘尫字師叔楚大夫左傳文公十六年楚伐庸庸人
囚于揚窗三宿而逸曰庸師衆羣蠻聚焉不如復大
師且起王卒合而後進師叔曰不可姑又與之遇以驕
之七遇皆北庸不設備楚子乘駟會師於臨品分為
二隊遂滅庸

申叔時楚大夫為申公左傳莊王使士亹傳太子叔
時歷告士亹以教太子之道楚子伐陳欲縣之叔時

使齊返諫曰徵舒弑君討而戮之義也今縣陳貪其富也無乃不可乎王曰善乃復封陳晉伐鄭楚救之過申子反入見叔時曰師其何如叔時曰楚內棄其民外絕其好瀆盟食言奸時以勳而疲民以逞民不知信進退罪也人恤所底其誰致死子其勉之吾不復見子矣果敗

士慶楚大夫劉向新序楚莊王蒞政三年不治士慶入再拜而進曰郢有大鳥來止南山之陽三年不蜚

不鳴不審其故何也王曰此鳥不蜚以長羽翼不鳴以觀羣臣之慝士慶曰所願聞已王大悅士慶之問而拜之以為令尹授之相印

士亹楚大夫左傳莊王使傳太子歲辭曰臣不才無能益焉王曰賴子之善善之對曰善在太子太子欲善善人將至若不欲善善則不用王卒使傳之

孫叔敖為賈子一名為艾獵一名饒左傳楚之處士也為楚相施教導民上下和合政緩禁止吏無姦邪

盜賊不起秋冬則勸民山採春夏以水莊王更幣市
亂教請復故楚俗好庠序不便馬王欲下令使高之
教曰令數下民不知所從臣請教閭里使高其梱乘
車者皆君子不能數下久之民悉自高其車不教而
民從其化故三得相而不喜知其材自得之也三去
相而不悔知非己之罪也按叔敖秀而多能其性無
欲爵益高而志益下官益大而心益小祿益厚而施
益博妻不衣帛馬不食粟其事雜見於韓非子莊子

淮南子列女傳說苑新序諸書其相楚之由或謂虞
丘子或謂沈尹筮或謂樊姬或謂相士教本公族父
為楚卿鬬椒之難隱於海濱則有之矣諸說未免附
會故優孟寢丘之事亦不具載

申舟楚大夫左傳宣公十四年楚子使申舟聘於齊
曰無假道於宋舟以孟諸之役惡宋曰我必死王曰
殺汝我伐之見屏而行及宋宋人止之華元曰過我
而不假道鄙我也乃殺之

潘黨潘尫之子左傳宣公十二年邲之戰魏錡求公族未得怒欲敗晉師請致師弗許請使許之遂往請戰而還楚潘黨逐之及滎澤見六麋射一麋以獻叔黨命去之黨既逐魏錡趙旃夜至於楚軍楚子乘左廣以逐趙旃晉人逆之潘黨望其塵使騁而告曰晉師至矣楚子使唐狡與蔡鳩居告唐惠侯使潘黨率遊闕四十乘隨唐侯為左拒克之遂次於衡雍

沈尹戌沈諸梁子高之父為沈尹左司馬左傳昭公

十九年楚人城州來。戊曰：「楚人必敗，未撫民而挑，吳能無敗乎？」二十三年，楚囊瓦城郢。戊曰：「子常必亡郢。」古者諸侯守在四鄰，諸侯卑守在四境。今吳是懼而城於郢，守已小矣。卑之不獲，能無亡乎？」二十四年，楚子爲舟師，以畧吳疆。戊曰：「此行也，楚必亡邑。」師還，吳果滅巢及鍾離。二十七年，楚卻宛之難，國人莫不謗。令尹戌言於子常曰：「夫左尹與中廐尹莫知其罪，而子殺之以興謗讟，至於今不已。戌也惑之，費無極。」楚

之讒人也民莫不知知者除讒以自安今子愛讒以自危甚矣其惑也子常殺費無極國言乃止

鍾儀楚大夫食邑於鄧左傳成公七年秋楚子重伐鄭晉帥諸侯救鄭鄭囚鍾儀獻諸晉晉人以鍾儀歸囚諸軍府九年晉侯觀於軍府見而問之曰南冠而縶者誰也有司對曰鄭人所獻楚囚也使稅之召而弔之問其族對曰伶人也公曰能樂乎對曰先父之職官也敢有他事使與之琴操南音公曰君王何如

對曰非小人之所得知也固問之對曰其為太子也
師保奉之以朝於嬰齊而夕於側也不知其他公語
范文子文子曰楚囚君子也言稱先職不背本也樂
操土風不忘舊也稱太子抑無私也名其二卿尊君
也不背本仁也不忘舊信也無私忠也尊君敏也仁
以接事信以守之忠以成之敏以行之事雖大必濟
君盍歸之使合晉楚之成公從之重為之禮使歸求
成

筦蘇一曰筦饒劉向新序楚共王有疾召令尹曰筦
蘇常忠我以道正我以義吾與處不安也不見不思
也雖然吾有得也其功不細必厚爵之申侯伯常縱
恣吾吾所樂者勸吾為之吾所好者先吾服之吾與
處歡樂之不見戚戚也雖然吾終無得也其過不細
必亟遣之令尹曰諾即拜筦蘇為上卿而遂申侯伯
出之境

申叔豫楚大夫左傳襄公二十一年楚康王欲使遠

子馮為令尹訪於申叔豫叔豫曰國多寵而王弱國不可為也遂以疾辭二十二年復使遠子馮為令尹有寵於遠子者八人皆無祿而多馬他日朝與申叔豫言弗應而退從之入於人中又從之遂歸退朝見之叔豫引觀起之已事譬之子馮歸曰吾見申叔夫子所謂生死而肉骨也辭八人而後王安之

遠子馮楚令尹善察事機不自滿假左傳襄公二十四年舒鳩人叛楚楚子使沈尹壽與師祁犁讓之舒

鳩子請受盟王欲伐之遽子曰不可彼告不叛且請受盟而又伐之是伐無罪也姑歸息民以待其卒卒而不貳吾又何求

為掩子馮之子左傳襄公二十五年為掩為司馬子木使庀賦賦車籍馬既成以授子木楚子以滅舒鳩賞子木辭曰先大夫為子之功也以與為掩三十年楚公子圍殺為掩而取其室申無宇曰善人國之主也絕民之主不祥莫大焉

屈建字子木屈到子為楚令尹左傳屈到嗜芰有疾
召其宗老而屬之曰祭我必以芰及祥宗老將薦芰
子木曰夫子不以私欲干國之典遂不用襄公二十
六年伍舉奔晉蔡聲子通使於晉還如楚子木問晉
大夫與楚孰賢對曰雖楚有材晉實用之楚多淫刑
其大夫逃死於四方而為之謀主今椒舉在晉矣彼
若謀害楚國豈不為患子木懼言諸王益其爵祿而
復之

公子貞字子囊莊王子為楚令尹左傳襄公九年秦
景公使士雠乞師於楚將以伐晉楚子許之子囊曰
不可晉不可敵十三年楚王疾自請謚為靈若厲王
薨子囊謀謚大夫曰君有命矣子囊曰君命以共若
之何毀之赫赫楚國而君臨之以屬諸夏而知其過
可不謂共乎請謚之共大夫從之十四年子囊還自
伐吳卒將死遺言謂子庚必城郢君子謂子囊忠君
薨不忘增其名將死不忘衛社稷

遠罷字子蕩左傳襄公二十七年楚遠罷如晉泣盟
晉侯享之將出賦既醉叔向曰遠氏之有後於楚國
也宜哉承君命不忘敏子蕩將知政矣敏以事君必
能養民政其焉往昭公元年楚靈王即位以為令尹
卞和劉向新序荆人卞和得玉璞而獻之荆厲王使
玉尹相之曰石也王以和為謾斷其左足武王即位
和復獻之使玉尹相之曰石也又以為謾斷其右足
共王立和乃奉玉璞而哭於荆山中王使人問之對

曰寶玉而名之曰石貞士而戮之以謾此臣之所以
悲也乃使人理其璞而得寶焉故名之曰和氏之璧
申無宇楚牛尹左傳昭公七年楚子為章華之宮納
亡人以實之無宇之閭入焉無宇執之有司弗與曰
執人於王宮其罪大矣執而謁諸王王將飲酒無宇
辭曰昔武王數紂之罪謂為天下逋逃主君王始求
諸侯而則紂無乃不可王命取其臣而去初楚子為
令尹時為王旌以田無宇斷之曰一國兩君其誰堪

之楚子滅蔡用隱太子於岡山無宇曰不祥五牲不相為用況用諸侯乎王必悔之王使棄疾為蔡公無宇曰臣聞五大不在邊五細不在庭親不在外羈不在內今棄疾在外鄭丹在內君其少戒未大必折尾大不掉君所知也

司馬奮揚楚城父司馬左傳楚平王使奮揚殺太子建未至而遣之太子奔宋王召奮揚使城父人執之以至王曰言出於余口入於爾耳誰告建也對曰臣

告之君王初命臣曰事建如事予臣不佞不能苟貳
奉初以還不忍後命故遣之王曰爾敢來何也對曰
使而失命召而不來是再奸也逃無所入王曰歸從
政如他日

倚相楚左史能讀三墳五典八索九邱嫻於辭命富
於訓誥楚人賢之國語左史倚相廷見申公子亹不
出左史謗之子亹怒曰汝無亦謂我老髦而舍我而
又謗我左史曰惟子老髦故欲見以交儼子昔衛武

公年數九十有五猶歲傲於國今子老楚國而欲自
安楚其難哉子亹曰老夫之過也乃驟見左史後司
馬子期欲以妾為內子倚相曰君子之行欲其道也
故進退周旋唯道之從子期乃止

遂啓疆左傳昭公元年楚靈王即位以遂啓疆為太
宰直而能諫諫而能盡

白公子張楚大夫國語靈王虐子張驟諫王用史老
之言拒之子張又引武丁及桓文之事以啓王王病

之曰子復語不穀雖不能用吾慙寘之於耳子張遂趨而退歸杜門不出七月乃有乾谿之亂

屈罷楚大夫左傳昭公十四年楚子使屈罷簡東國之兵於召陵好於邊疆息民五年而後用師

郤宛字子惡楚大夫左傳郤宛直而和國人悅之鄢將師與費無極比而惡之令尹子常賄而信讒無極譖郤宛焉令尹召鄢將師攻郤氏且熱之子惡聞之遂自殺也國人弗熱

鬪且楚大夫國語鬪且廷見令尹子常問蓄貨聚焉
歸語其弟曰楚其亡乎不然令尹其不免乎無令名
於四方民之羸餒日甚道殣相望盜賊伺目是之不
恤而蓄聚不厭其速怨多矣不亡何待期年乃有柏
舉之戰子常奔鄭

公子申字子西昭王庶兄左傳昭公二十六年楚平
王卒令尹子常欲立子西子西怒曰是亂國而惡君
王也必殺令尹令尹懼乃立昭王定公四年吳入郢

昭王奔隨子西為王與服以保路國於脾洩聞王所
在而後從王六年吳敗楚舟師楚國大惕子西喜曰
乃今可為矣於是乎遷郢於都而改紀其政以定楚
國哀公十六年白公作亂為所殺

藍尹亶楚大夫國語子西歎於朝藍尹亶曰吾聞君
子惟獨居思念前世之宗替與哀殯喪於是有歎君
子臨政思義飲食思禮同宴思樂在樂思善無有歎
焉子惠德政之不修無患吳矣初昭王出奔濟於成

曰見疊以舟載其帑王號曰載子對曰自先王莫隊
其國當君之身而亡之君之過也遂去王歸又求見
王使詰之對曰昔瓦惟長舊怨以敗於柏舉故君及
此今又效之無乃不可乎臣避於成臼以儆君也今
之敢見觀君之德也君若不鑒而長之君實有國而
不愛臣何有於死死在司敗矣子西曰使復其位以
無忘前敗王乃見之

江上丈人楚人高士傳楚平王以費無極之讒殺伍

奢奢子負亡將奔吳至江上欲渡無舟而楚人購負
甚急自恐不脫見丈人得渡因解所佩劍以與丈人
曰此千金之劍也願獻之丈人曰楚國之法得伍胥
者爵執珪金千鎰吾尚不取何用劍為不受而別莫
知其誰負至吳為相求丈人不能得每食輒祭之曰
名可得聞而不可得見其江上丈人乎

石奢史記循吏列傳楚昭王相也堅直廉正無所阿
避行縣道有殺人者相追之乃其父也縱其父而還

自繫焉王使治事奢曰不私其父非孝子也不奉主法非忠臣也王赦其罪上惠也伏誅而死臣職也遂不受令自刎而死

王孫圉楚大夫事昭王國語王孫圉聘於晉定公饗之趙簡子鳴玉以相問曰楚之白珩猶在乎其為寶也幾何矣圉對曰楚有觀射父能作訓詞以行事於諸侯使無以寡君為口實又有左史倚相能道訓典以叙百物以朝夕獻善敗於寡君使寡君無忘先王

之業又能上下悅乎鬼神順道其欲惡使神無有怨
恫於楚國又有藪曰雲連徒洲金木竹箭之所生也
龜珠齒角皮革羽毛所以備賦用以戒不虞者也所
以共幣帛以賓享於諸侯者也此楚國之寶也若夫
白珩先王之玩也何寶焉

觀射父楚大夫達諸祀典習於彛訓惇信而文淳精
而慤國語昭王問於觀射父曰周書所謂重黎實使
天地不通者何也又問祀牲何及又問祀不可以已

乎射父歷舉事神息民之道三代典禮俱可校覩焉
蒙穀楚將國策柏舉之戰蒙穀結鬪於宮唐之上舍
鬪奔郢曰若有孤楚國社稷其庶幾乎遂入大宮負
雞次之典以浮於江逃於雲夢昭王自隨反郢蒙穀獻
典五官得法百姓大治此蒙穀之功多與存國相若
封之執圭田六百畛蒙穀怒曰穀非人臣社稷之臣
也遂自棄於磨山之中

任不齊史記仲尼弟子列傳任不齊字選孔子弟子

鄭氏曰楚人唐贈任城伯宋加封并城侯

秦商史記仲尼弟子列傳秦商字子丕孔子弟子鄭氏曰楚人

左丘明楚左史倚相之後杜預春秋左傳序左丘明受經於孔子身為國史躬覽載藉廣記而備言之或先經以始事或後經以終義或依經以辯理或錯經以合異隨例而發其例之所重微而顯志而晦婉而成章盡而不汙懲惡而勸善按朱子刊四經於臨漳

特出左氏經別為一書以踵三經之後且云公穀二經所以異者類多人名地名而非大義之所繫故不能悉具三傳優劣於此亦可概見

駢臂史記仲尼弟子列傳孔子傳易於商瞿瞿傳楚人駢臂子弘正義曰顏師古云駢姓也漢書及荀卿子皆云字子弓此作弘蓋誤

公孫龍史記仲尼弟子列傳公孫龍字子石孔子弟子少孔子五十三歲鄭氏曰楚人

楚狂接輿楚人佯狂辟世孔子適楚楚狂接輿歌而過孔子詳見論語莊子所述迷陽之言與此小異高士傳陸通字接輿楚人也好養性躬耕以為食楚昭王時通見楚政無常乃佯狂不仕故時人謂之楚狂楚王聞其賢遣使往聘曰王請先生治江南通笑而不應偕妻隱蜀峩眉山壽數百年俗傳以為仙云承蜩丈人莊子達生外篇仲尼適楚出於林中見痾僂者承蜩猶掇之也仲尼曰子巧乎有道耶曰我有

道也五六月累九二而不墜則失者錙銖累三而不墜則失者十一累五而不墜猶掇之也吾處身也若擷株拘吾執臂也若槁木之枝雖天地之大萬物之多而唯蜩翼之知吾不反不側不以萬物易蜩之翼何為而不得孔子顧謂弟子曰用志不分乃凝於神其病偻丈人之謂乎又有楚漁者孔子之楚獻魚曰天暑行遠思欲棄之不若獻之孔子受而祭之

漢陰丈人莊子外篇子貢南遊於楚過漢陰見一丈

人為圃畦鑿隧而入井抱甕而出灌澆澆然用力甚多而見功寡子貢曰有械於此一日浸百畦用力甚寡而見功多夫子不欲乎為圃者仰而觀之曰奈何曰鑿木為機後重前輕挈水若抽數若沃湯其名為輶為圃者忽然作色而笑曰吾聞之吾師有機械者必有機事有機事者必有心機心存於胸中則純白不備純白不備則神生不定神生不定者道之所不載也吾非不知羞而不為也子貢愕然慙俯而不

能對

庚桑楚楚人莊子雜篇老聃之後有庚桑楚者偏得
老聃之道居畏壘之山三年大穰畏壘之民將欲尸
祝而社稷之庚桑子聞之南面而不釋然弟子異之
庚桑子曰吾聞至人尸居環堵之室而百姓不知所
如今以畏壘之細民而竊竊焉欲俎豆子於賢人之
間我其杓之人耶吾是以不釋於老聃之言按莊子
一書大抵寓言所引人物半屬子虛烏有之類若承

蜎丈人漢陰丈人唐桑楚三人疑以傳疑未敢信其必有也

於陵子荆志荆人初襄王聞於陵子賢欲以為相使人持金往聘入語其妻不可於是出謝使者而辭之相與逃去

昭奚恤楚大夫劉向新序秦欲伐楚使使者往觀楚之寶器王使昭奚恤應之昭奚恤發精兵三百人陳於西門之內為東面之壇一為南面之壇四為西面

之壇一秦使者至昭奚恤曰君客也請就上位東面
令尹子西南面太宗子教次之葉公子高次之司馬
子反次之昭奚恤遂居西南之壇稱曰客欲觀楚國
之寶器楚國之所寶者賢臣也理百姓實倉廩使民
各得其所令尹子西在此奉珪璧使諸侯解忿悁之
難交兩國之歡使無兵革之憂太宗子教在此守封
疆謹境界不侵鄰國鄰國亦不見侵葉公子高在此
理師旅整兵戎以當彊敵提枹鼓以動百萬之衆所

使皆趨湯火蹈白刃出萬死不顧一生之難司馬子
反在此懷霸王之餘議攝治亂之遺風昭奚恤在此
唯使者之所觀秦使者懼然無以對昭奚恤遂揖而
去

沈諸梁字子高左司馬沈尹子為葉公左傳哀公十
六年鄭人殺子木其子勝在吳子西欲召之葉公曰
吾聞勝也詐而亂無乃害乎弗從召之使為白公後
勝果作亂殺子西子期而刳惠王葉公入討及北門

或遇之曰君胡不胄國人望君如望慈父母焉盜賊
之矢若傷君是絕民望也乃胄而進又遇一人曰君
胡胄國人望君如望歲焉若見君面是得艾也乃免
胄而進與國人共攻殺勝國寧乃使子西之子寧為
令尹子期之子寬為司馬退而老於葉

公孫寧字子國子西之子也左傳哀公十八年已人
伐楚圍鄢初右司馬子國之卜也觀瞻曰如志故命
之及已師至將卜帥王曰寧如志何卜焉使帥師而

行請承王曰寢尹工尹勤先君者也三月敗巴師於
鄆封於祁及為令尹太宰子朱嘗侍飯子國啜羹而
熱投漿而沃之明日子朱辭官歸謂其僕曰令尹輕
而簡禮其辱人不難明年伏藍尹而笞之三百按子
朱亦智士也因并志之

屈廬楚臣劉向新序白公勝既殺子西子期拔劍而
屬於屈廬曰子與我將舍子子不與我必殺子廬曰
吾聞知命之士見利不動臨死不恐為人臣者時生

則生時死則死是謂人臣之禮故上知天命下知臣道其有可劫乎白公勝乃內其劍

申鳴韓詩外傳鳴治園以養父母孝聞於楚王召之辭不往其父令之仕遂之朝楚王以為左司馬其年遇白公之難殺子西子期申鳴因以兵之衛白公謂石乞曰申鳴天下勇士也今將兵奈何石乞曰吾聞申鳴孝也劫其父以兵使人謂申鳴曰子與我則與子楚國不與我則殺乃父申鳴流涕而應之曰始則

父之子今則君之臣已不得為孝子矣安得不為忠臣乎援桴鼓之遂殺白公其父亦死王歸賞之申鳴曰受君之祿避君之難非忠臣也定君之國以殺其父非孝子也行不兩全名不兩立悲夫若此而生亦何以示天下之士哉遂自刎而死

莊善楚臣劉向新序白公之難楚人有莊善者辭其母將往死之母曰棄其親而死其君可謂義乎莊善曰吾聞事君者內其祿而外其身今所以養母者君

之祿也身得無死乎遂辭而行比至公門三廢車中
其僕曰子懼矣荅曰懼者吾私也死義吾公也君子
不以私害公及公門刎頸而死

白善姓譜白公勝之族為楚將家澧陽白公將為亂
名之善曰從子而亂其國則不義於君背子而發其
私則不仁於族遂棄其祿築圃灌園以終其身澧人
名其圃曰白善將軍藥圃

熊宜僚楚人左傳哀公十六年白公勝欲殺子西謂

石乞曰市南有熊宜僚者若得之可當五百人乃從
白公而見之與之言說告之故辭承之以劍不動勝
曰不為利諂不為威惕不洩人言以求媚者去之

公叔文子楚大夫平王孫子期子魯陽公也惠王欲
以梁與文子文子辭曰梁險而在楚北境懼子孫之
有貳也縱臣得保首領以歿懼以梁險而乏臣祀也
王曰子之仁不忘子孫施及楚國敢不從子乃與之

魯陽

舊通志

鐸椒前漢藝文志鐸氏微三篇注楚太傅鐸椒也慮
王不能盡觀春秋采取成敗四十章以獻名曰鐸氏
微

田贊楚人劉向新序田贊衣儒衣而見荆王王曰先
生之衣何其惡也贊對曰衣有惡於此者夫衣無惡
於甲冬日則寒夏日則熱苟慮害人人亦必慮害之
苟慮危人人亦必慮危之王無以應

莫敖子華國策楚威王問憂社稷者莫敖子華對曰

昔令尹子文廕其爵貧其身以憂社稷葉公子高崇其爵豐其祿以憂社稷芬冒勃蘇勞其身愁其思以憂社稷蒙穀不為爵勸不為祿勉以憂社稷王乃太息子華曰其君好發者其臣決拾君王直不好耳

陳良

見孟子

昭睢楚臣史記楚世家齊湣王惡楚之與秦合乃遺楚王書王業已欲和於秦昭睢曰王不如深善齊韓懷王許之竟不合秦而合齊以善韓秦昭王請盟於

武關雎勸王毋行惟發兵以自守王曰奈何絕秦之
驩心於是往會秦昭王至則閉武關懷王大怒悔不
用昭子言秦因留楚王楚大臣謀立王之庶子雎曰
王與太子俱困於諸侯而今又背王命而立其庶子
不宜乃詐赴於齊歸太子橫立為頃襄王

陳軫楚大夫史記楚世家秦使張儀見楚王懷王乃
置相璽於張儀宣言吾復得吾商於之地羣臣皆賀
而陳軫獨弔曰秦之所以重王者以王之有齊也今

地未可得而齊交先絕必見欺於張儀王弗聽乃使
勇士辱齊齊折楚符而合於秦懷王怒興師將伐秦
軫又曰伐秦非計也今王已絕於齊而責欺於秦是
合秦齊之交而來天下之兵也王不聽發兵攻秦遂
大敗

傳慎子頃襄王傳也國策楚襄王為太子質於齊齊
王要其獻東地五百里慎子曰獻之便太子歸即位
齊使來求東地慎子曰王明日朝羣臣皆令獻其計

上柱國子良人見曰不可不與也與而復攻之昭常
人見曰不可與也請守之景鯉人見曰不可與也雖
然不能獨守請索救於秦王以三大夫計告慎子曰
王皆用之王發子良北獻地即遣景鯉西索救於秦
又即使昭常守之齊來攻則秦救至秦責齊齊王恐
焉士卒不用東地復全

莊辛楚人國策莊辛謂楚襄王曰君王左州侯右夏
侯輦從鄢陵君與壽陵君專淫逸侈靡不顧國政郢

都必危矣王責以老悖辛謂其必然請避於趙以觀之方五月秦果舉鄢郢巫上蔡陳之地王流於咸陽於是使人發騶徵莊辛於趙辛至乃廣喻以諷襄王色變體慄以執珪授之為陽陵君

漁父楚辭屈原既放游於江潭行吟澤畔顏色憔悴形容枯槁漁父見而問之曰子非三閭大夫與何故至於斯屈原曰舉世皆濁我獨清衆人皆醉我獨醒是以見放漁父曰聖人不凝滯於物而能與世推移

世人皆濁何不掘其泥而揚其波衆人皆醉何不舖
其糟而飲其醕何故深思高舉自令放為屈原曰吾
聞之新沐者必彈冠新浴者必振衣安能以身之察
察受物之汶汶者乎寧赴湘流葬於江魚之腹中安
能以皓皓之白而蒙世俗之塵埃乎漁父莞爾而笑
鼓枻而去歌曰滄浪之水清兮可以濯吾纓滄浪之
水濁兮可以濯吾足遂去不復與言

武昌府

蜀漢費禕蜀志列傳字文偉江夏鄆人少孤隨族父伯仁往依劉璋先主定蜀立太子禕為舍人遷庶子後主時為郎中丞相亮請為參軍後為司馬值魏延楊儀相憎禕常諫喻得各盡其用亮卒禕為後軍師代蔣琬為尚書令國方多事公務煩猥禕省書記舉目即了意義常以朝晡聽事其間接納賓客盡人之歡事亦不廢延熙七年魏軍次於興勢遣禕禦之來敏至求共圍棋時羽檄交馳嚴駕已訖禕留意對奕

色無厭倦敏曰聊試君耳君必能辦賊禕至敵遂退
十一年出屯漢中慶賞威刑雖身在外遙先諮斷乃
行其推任如此後進開府十六年為魏降人郭循所
害謚敬侯子丞嗣為黃門侍郎丞弟恭尚公主為尚
書郎

三國李通魏志列傳字文達江夏平春人以俠聞初
與同郡陳恭起兵於朗陵恭妻弟陳邵殺恭而據其
衆通斬邵首以祭恭墓建安初歸魏拜中郎將破張

繡封建功侯時魏主與袁紹相拒於官渡紹嘗誘以
官爵斬其使送印綬詣許後定淮汝地封都亭侯拜
汝南太守卒謚剛侯子基襲爵

晉李重晉書列傳字茂曾江夏鍾武人少好學早孤
與羣弟居以友愛著弱冠為始平王文學上疏論九
品官人法遷太子舍人轉尚書郎後遷尚書吏部郎
不通私謁留心隱逸由是羣才畢舉後言官僚內重
外輕及請搜求隱逸不從出為平陽太守崇德化修

學校表薦行拔賢能正身率下永康初趙王倫用為
相國左司馬以憂逼成疾卒年四十八家貧宅隘無
殯殮地詔於典客署營喪追贈散騎常侍謚成子式
有才名官至侍中

王偃晉書張昌傳偃江夏舊姓江安令值義陽蠻賊
張昌橫熾江夏士庶莫不從之惟偃與秀才呂羆不
從昌以三公位徵之偃羆密將宗室北奔汝南投豫
州刺史劉喬鄉人期思令李權常安令吳鳳孝廉吳

暢糾合善士得五百餘家追隨偃等不豫妖逆

南北朝李珪之南齊書列傳字孔璋江夏鍾武人父

祖皆縣令珪為鎮西諮議右將軍兼都水使者歷職

稱清能進尚書右丞中外穀帛至賤建議出上庫錢

五十萬及諸州錢皆令雜買從之後無少府

按中外穀帛一

段見舊通志

宋王質宋史列傳字景文其先鄂州人後徙興國質
博通經史善屬文遊太學與九江王阮齊名阮每云

聽景文論古如讀鄴道元水經名川支川貫穿周匝
無有間斷咳唾皆成珠璣著論五十篇言歷代君臣
治亂謂之樸論登紹興進士金南侵汪澈宣諭荆襄
張浚都督江淮皆辟為屬人為太學正上疏論戰守
和之宜孝宗知其忠而忌者讒之遂罷去曾虞允文
宣撫川陝辟令草檄契丹文援毫立就詞氣激壯允
文見曰天才也薦質鯁亮不回可右正言中貴人多
畏憚陰沮之出判荆南府改吉州皆不行奉祠山居

絕意祿仕淳熙十五年卒

明李廣楚紀咸寧人父鵬翔有時名吳元年平定豫章命為江西叅議同陶從善招諭熊天瑞有功授宣

武校尉

陳文禮字貴和蒲圻人洪武中貢生拜監察御史會
有冤獄屢譏莫決文禮立辨奸誣人服其明斷

郡志

韋臯楚紀江夏人洪武初知饒州德興縣招撫流亡
聚兵障寇時開礦權銅為民患奏罷之乃修學校建

橋梁拓秦蕪遂為樂土

李祥字從吉明一統志咸寧人洪武初督撫斷事歷尚寶卿浙江按察使進四川右布政歸祥識度明雅上素重之親為誥詞極其褒美

何爚字仲伯蒲圻人槐孫之子學有淵源以篤行聞授休寧縣簿時徵賦督迫區畫有方民賴休養採木築城不憚寒暑後坐事免民思慕之復以明經薦知雲南鎮南州

童以明字明昭嘉魚人克篤親愛事叔如父由舉人
為遷江令興學校勵末俗設婚禮洞獠莫不服從在
任六年卒歸之日行橐蕭然人服其清操

以上舊通志

李懋楚紀蒲圻人洪武初任新昌知州時兵燹之餘
百務廢弛懋創州治學校橋梁悉加修葺又為諭俗
八條懇惻真切民咸感化

鄧槐分省人物考字大材蒲圻人洪武庚辰進士令
新繁創規制立條教修水利墾荒田民多賴之再任

新津政聲益著蜀志謂新繁有清白江槐以此自勵
故終身清白

孔克仁字原夫聖裔父為興國路教授因家焉洪武
初與宋濂應召講左氏春秋同被寵遇所賜制詔凡
一十三函累官浙東按察使

龍景亨字伯通蒲圻人永樂丙戌進士性英毅遇事
敢言孤介不能容物授監察御史權稅龍江人不敢
犯與羅弘陳文禮稱臺中三直

以上舊通志

王庚分省人物考字仲景江夏人正統壬戌進士任
戶科給事中會山西有邊警以庚練達兵事改御史
巡按山西簡卒伍勤訓練嚴守備事平遷左給事中
歷官廣東右布政使

黎忠分省人物考字行恕江夏人正統中任建昌推
官閩寇鄧茂七攻陷隣境忠屢出奇謀摧賊鋒擢福
建知府

陳文偉江夏人中正統丁卯武科膂力過人嘗以手

斃虎會試場屋火文偉左據牆右持同事生足履肩
而出活若干人知安邱有賊百餘掠庫金去文偉單
騎挾彈追之問賊首彈發中其左目再發中右賊皆
伏地請送庫金還偉以一騎尾後賊抵縣各杖三十
遣之而御史竟以縱賊論免其官

孔儒字宗學嘉魚人景泰庚午鄉薦丁丑春會闈災
闈中官司悉逃避儒升牆端引手拯出者無算事聞
上召諭勞不俟終闈即賜進士授監察御史數上疏

動關大計常以星變條陳災異指斥無所忌諱清軍
南浙風節凜然後除慶遠知府致仕

以上舊通志

艾傑分省人物考字世英崇陽人天順鄉舉苦學安
貧知府秦夔以其邑絕田百畝予之謝不受授江安
諭力正文體每坐講堂必嚴肅衣冠終日無懈容生
徒中不能婚喪者助之修蜀志遷成都教授

魏銘字日新觀曾孫景泰辛未進士授戶部主事監
通州倉稅以抗禮直指調景東倅改揚州時郡旱甚

銘躬禱三日大雨若注郡大熟遷温州守投劾歸居

官清介卒之日不能具喪禮

舊通志

黃珪分省人物考字敬潤蒲圻人成化乙未進士令
高安為政嚴峻豪宗屏跡拜監察御史不畏強禦時
貴州苗亂勅珪改土為流改州為衛厥功居多陟大
理寺丞

李承芳分省人物考字茂卿嘉魚人年十四伯父田
指鄉富貴者示之曰兒志比乎對曰富貴不淫貧賤

樂兒志也弘治庚戌成進士授大理評事陞寺副遂
謝病歸與其弟承箕隱黃公山講學論道雖蔬食屢
空不悔著東嶠集子榮任代州學官

江師古分省人物考字克永蒲圻人弘治癸丑進士
授工部主事管清江浦閘時中貴作威凌轢師古不
為屈逆瑾柄國即抗疏歸性儉樸敝衣垢被陋室匡
牀翛然肆意

廖漢分省人物考字天章蒲圻人弘治丙辰進士授

戶部主事陳情使養改南京孤介有聲時督儲都御史葉鰲偏執徇權力與爭辨兌法司徒王軾譴之逆瑾柄國上疏抗論時政不報再疏自陳即徒步出都買舟南歸結茅五洪山下布衣竹杖時與樵夫田叟阡陌坐談督耕課子非其力不食子道南別傳

王疇分省人物考疇字叙之崇陽人幼聰慧不羣三歲失母哀毀如成人事繼母尤謹正德戊辰成進士授南大理評事有誣殺人者獄成疇力辨其非人嘗

之尋獲要犯於淮北武宗時內殿災以四事規諫擢
江西僉事陞四川副使歸家居手不釋卷性方正清
貧晏如著有石洲文集

汪必東字希曾明一統志崇陽人正德辛未進士官
禮部郎議大禮廷杖瀕死後除廣西少叅進雲南叅
政東邃於經史凡禮部大典文字悉出其手善草書
生平不喜談象山學著有南雋文集易問大旨

廖道南分省人物考字鳴吾漢之子正德辛未進士

選庶常歷侍講學士經筵輪講多直言日食陳洪範
天變四事又陳六事上郊廟大禮議請撤姚廣孝配
享建壁雍立帝王廟申明大禘議皆嘉納應制諸作
每奏輒嘆賞賜賚遭柄臣忌謫徽州通判明年復職
終以忌免卒於家所著有文華大訓歲殿閣詞林記
楚紀及元素子集

劉守緒字克承興國人正德甲戌進士令奉新平租
徭理獄訟政尚簡靜民自帖然適宸濠反起義兵從

王守仁合剿之濠自攻安慶留賊萬餘守南昌伏賊數千城外緝從間道夜襲破之遂復省城論功陞

至太僕卿

舊通志

黃表字一屏咸寧人黃子澄後子澄既及禍幼子仲貞與義子文富抱骨葬於蒲之郭家潭易姓去共為田名中直潛居咸之灣湖生達穎穎生秩仁宗登極嘉澄忠詔錄其後許復姓再傳為表生而穎異日記數千言成進士授工部主事嘉靖初議興獻禮稱旨

以父艱歸卒

劉守嶠字景仁興國人嘉靖辛卯舉人令儀隴攝大竹以最遷南昌府同知兩邑爭留各立祠以祀南昌有熊生為嚴嵩姻戚侵鄉人田愬諸上官有司不敢問檄同知鞠訊嶠召生至自脫官帽於案上命鞭之悉還所侵田竟納綬去

姚亨字嘉會咸寧人英敏絕倫日記寸卷讀廿一史三月成周廖道南推為八斗才以嘉靖甲午鄉薦任

戶曹致政歸惟圖書數卷餘俸十金子民親淹雅有父風求文者日難遍給就牀褥間口授之

胡希瑗字橋南大治人嘉靖丁酉舉人任潼川州省郵傳清鹽井奸吏屏跡鄉有御史貌法害民治之不少貸適構三殿奉檄取儒學喬木瑗不可曰奈何伐文廟所植以為功採山木代之以勞瘁卒於任州人祠祀吳國倫為誌其墓

唐時舉字省庵咸寧人父毓明經時舉成嘉靖丁未

進士令會稽為政簡易周悉民隱獎藉寒素首拔陶
望齡入為大理左評值嚴嵩興大獄株連頗濫多所
平反未幾卒於官

胡希寅字于野大治人嘉靖丙午鄉舉令開建值丁
祭徭賊突至衆倉皇走寅曰賊至當捍衛城郭走者
治以軍法乃糾聚三百人親冒矢石賊驚走乘勢擊
之殲百餘人自是賊不敢犯陞常州通判致仕

以上

俱舊通志

謝鵬舉三楚文獻錄字仲南蒲圻人嘉靖癸丑進士授戶部主事歷守臨江廣寇張漣黨犯清江鎮舉躬擐甲胄截江大戰令善没人下鑿賊艦賊不得渡乘其溺大破之憲司欲盡戮其俘舉曰此皆良民為賊驅迫者殺之不忍全活甚衆遷廣東叅政海寇曾一本築高壘臨城舉嬰城固守不能下再遷浙江左布政使入覲廉能為天下第一遷副都御史督兵勦倭或請窮海盡滅之舉曰殺無辜而欺朝廷吾不為也

尋掌南院後與張居正議論不合投劾歸門庭蕭寂
長吏罕見其面朝廷遣官存問卒年九十三予祭葬
熊兆祥字汝飛蒲圻人嘉靖壬子鄉舉令峩峩時經
妖寇蔡百貫之亂一意休養葺學宮崇儒術又引龍
門洞水作堰開渠灌潤百里區畫越雋屯田經界清
軍官混徵積弊又戢都蠻之亂遷重慶通判以母老
終養歸

舊通志

胡定字正叔崇陽人瀕于嘉靖丙辰進士初知德清

會倭亂奏減軍餉萬餘金以蘇吳越任參議計擒巨盜趙天智散礦徒數千人所至風裁整肅以廣西左布政使致仕

馬之猊字威如蒲圻人舉嘉靖甲子鄉試知養利州舊有藥魚鴨市馬牛及諸土物之利悉罷之丁艱補茂州州軍多於民牧魚監軍餉因著色封事宜軍感其惠與監司爭安撫封議不合歸性至孝每逢親忌日涕泣如初沒年八十三卒

張書字于中蒲圻人隆慶戊辰進士授工科時總河
潘某糜費罔功抗疏論之遷掌兵科大同都督馬芳
賸削行伍具狀劾奏芳輦金請釋面唾之忤時相出
為河南叅政有李天公者為地室聚兵糧謀亂密計
擒獲遭忌中京察屢起屢蹟未竟其用以刑部主事
致仕歸

江沛然字應吾江夏人隆慶辛未進士知吉水俗多溺
女然嚴禁之遷南部郎以蜚語中京察再遷審理遂歸

王煥字午槐咸寧人隆慶辛未進士三為縣令有同名王渙之頌陞部郎理閩河病予告歸檢索得百金迫家人投諸河曰無留此為身累也

向宸字賓白大冶人篤志正學萬厯間以歲薦授曲靖通判見三教祠改為孔氏祠迎先師像於中祀焉胡應辰字汝拱大冶人父希瑗卒潼川守吏挽輓出側門辰年十三叱由中出家甚貧一老僕負薪自給萬厯癸未登進士授主政權江州稅不以絲毫自潤

轉餉蘭州持籌省約一日戍兵盡出敵薄城下令老
弱乘陣多張旗幟以疑之敵為却三日督臣邵光先
援始至奏聞賜白金文綺旋備兵川東監軍討播獲
其前鋒值李旭議撫撤兵遂罷歸年七十二卒子允
同孫繩祖念祖俱孝廉率祖以詩文名曾孫夢發另
傳

段然字煥然江夏人萬厯乙未進士歷知南平吳縣
輝縣俱有異政遷給事屢獻讜言會宗室華越等訐

奏楚藩然上疏直華起時相忌之謫江西按察知事

遷兵部員外以風節聞

以上舊通志

余正節三楚文獻錄字振衡大治人萬厯辛丑進士授主事權臨清關有惠政歷補吉州知府講求馬驛漕艘為畫一之政時所在祠魏璫吉有請以白鷺書院為祠者力拒之適妖賊狂逞兩臺奏留叅藩節簡將士足糗糧嚴斥堠運畧出奇屢勦賊鋒擢撫南贛以勞瘁卒子文明際明謨明浚明順明允明俱知名

王台彥蒲圻人萬厯癸卯鄉舉授達州守適白蓮妖聚黨萬人刻日攻城有來告者彥故不問至三乃曰彼焚香號佛甚善若敢以大辟誣淳民耶賊魁大喜明日入州自理彥擒之立斃杖下旋諭散其黨丁父喪還補知信陽楊漣喪歸人莫敢視彥撫棺哭盡哀厚卹之遷畢節道副使安位以爭界內亂使者往勘數輩不返黔督朱變元屬彥往諭以十餘騎造水西其驍帥阿馬味者以數千衆來迎佯跪聽諭時時摩

浮刀環盤掣挽弩以示不下及就寢有蠻祕獻金珠
彥曰使吾可威劫寧肯入爾界使吾可貨誘豈能平
爾界界不平爭且不息汝曹首領莫保矣蠻氣奪獻
印歸命按圖立表定界而還晉蒼梧叅政乞休歸方
彥終喪之官取木主佩之郵邸設位公服趨拜然後
就室每視獄焚香祝天誓無冤民性仁孝如此

舊通

志

任遇隆字衡雲蒲圻歲貢事兩繼母撫諸弟孝友無

間言初訓長沙遷諭臨武覃思理學學使黃景星委
課衡土山徭亦遣子聽講遷酉陽授辭不就年八十
卒

游士仕字肩生嘉魚人徙江夏萬厯庚戌進士令長
興遷御史熹宗初魏璫附客氏以蠱上心任慨然曰
此禍本也會差山東巡按陛辭先一日具疏叅魏客
自是臺諫交章皆士仕啓之也及璫矯旨殺楊漣並
逮士任下錦衣獄拷掠不死謫戍安慶懷宗改元詔

釋之還其冠服

陳之消字澹夫江夏人萬歷庚戌進士知晉江縣累
官山西副使所至卓有政聲魏瑞秉政遂乞終養歸
孟登字誕先武昌人父紹慶萬歷庚辰進士任雲南
副使征沔賊有功登讀書強識尤倜儻負奇氣以已
酉舉人知騰越州時流賊數十人持兵器假官軍裝
入州署登啗以酒食悉擒殺之上臺疑非實坐落職
登善古文詩詞與艾南英劉侗譚元春諸人游才名

相埒

熊則正字興國崇陽人萬厯丙辰進士初令建安召為河南道御史時魏璫擅權楊漣首冒兇鋒正憤激同科道合叅又單疏切指其罪狀璫銜之密令邏者偵其短卒不可得秩滿外遷以憂憤卒於官

向日丹字懷赤大冶人由選拔令營山明恕廉能調繁廣元時大軍討楊應龍廣元當其衝師旅雲集妾丹散餉絕無留滯更練士兵為之鄉導紀功優叙會

直指某銜丹兄侍御日紅因阻之量移知阿迷州丹因歸與兄倡和林泉居母喪廬墓三年人稱其孝

王鼎彥字隨菴蒲圻人萬厯壬子舉於鄉再任縣令遷刑部郎中懷宗時為榆林兵備有張自得者大帥張天禮帳下卒也劫天禮據城以叛結楊光明等為外援彥計給光明殺自得受降復招流寇賀弘啓等六千餘騎邊餉缺兵皆食草實幾為變彥百計撫之遷桂林叅議以寇變不就至卒時貧不能葬

魏說字肖生蒲圻人棠之孫居喪以孝稱萬厯戊戌
進士授工部主事時鄭妃怙寵朝母后禮宜侍立遷
怒宮人不為置座憤使神宗擊扑之勅取梨木方條
日斃數命說以杉木易之且減其數以進上亦霽威
典試東粵督學蜀中皆著藻鑑名厯山東廉使妖賊
竊發守禦招撫遷太僕卿轉府尹以羨金充餉而減
民間征額日與諸生講業論文遷戶部右侍郎僉都
御史魏璫以同姓諷之峻拒歸年八十卒

以上舊通

志

朱英骹三楚文獻錄字賓桃楚藩諸孫受書外傳有
為心性躬行言者則彙而成冊不好浮詞比長築共
學堂與同邑賀陽亨黃陂黃武臯武濱互為師友其
學尚敦修不貴冥悟父卒居墓三載兩臺疏其行神
廟嘉之未幾建宗學求可為宗子師者遂拜骹為大
宗正又華決者早辭中尉祿獲賜忠廉坊額

劉炳文字心白崇陽人以父日字征倭功世襲指揮

旋中武科歷清浪叅軍靖苗紀功遷漕河叅將勦白
蓮妖賊於寇氛中輓漕六千艘脫於險會兵大勦獻
俘擢狼山總兵病卒

舊通志

王應斗字天喉崇陽人天啓壬戌進士令鄱陽舉卓
異考選御史屢抗疏直言柄臣驅逐異己者下於理
旋釋歸

汪桂字伯貞崇陽人天啓乙丑進士以戶部主事權
闕江州力蘇商困及任滿將代而復增稅額桂為那

貸數應不復累及賈人遷建寧知府

李應選字晉卿江夏人天啓乙丑進士令閬中民苦
春稅選定夏秋二限閬人德之遷主事督餉蘭州禦
寇撫民擢靖邊道民阻留不得行隻身赴任撫邊有
功歷方伯又陞江西巡撫未行卒於藩署清操如水
家人爨烟莫繼不能扶柩歸里後十年乃歸葬

周有翼字翹公武昌人天啓辛丑鄉魁授保寧推官
文案山積判斷如流錄囚多所平反攝篆已州有捍

流賊功再遷廬州守時城為流賊所毀翼至力築完之

李軫字君翼蒲圻人天啓丁卯鄉舉任國子助教預修國史遷戶部主事督海運會新太倉火兵衛馳救焰熾莫敢逼軫至出袖中書冊傳語市民有以一器水來者領一字有能嚮邇撲滅領數字次日重賞於是水器湊集而焰熄人服其敏

熊開元字魚山嘉魚人天啓乙丑進士令吳江六年

有善政舉最入省垣以前任征輸不足謫外久之補
行人副時閣臣周延儒擅權元具疏糾之上震怒下
鎮撫獄都御史劉宗周請釋元上愈怒落宗周籍杖
元仍繫詔獄至十七年始出

李玉字珍之咸寧人天啓甲子舉人博學強識有經
世之志懷宗時峽山賊熾守道袁繼咸資方略於玉
遽討平張獻忠陷楚謀致之遁而免未幾卒

任弘震字淡公嘉魚人早慧八歲咏梅詩有殘雪休

競艷看君和鼎時之句懷宗庚午與長子喬年同舉
於鄉庚辰成進士筮仕戶部郎立品清高古道自勵
程鐸字仲聲江夏人懷宗戊辰進士授惠州府推官
會九連山賊程萬等亂起鐸單車抵賊巢諭降其黨
鍾林房猶負固鐸率程萬等往殲之山賊悉平凱旋
疾作取筆書英雄氣盡四字遂卒民立祠祀之

尹民興字宣子嘉魚人懷宗戊辰進士令寧國調繁
涇縣懲奸剔弊有神明之譽丁艱歸服闋入都奏十

四策上嘉納之召對平臺面陳兵務歷職方郎盡屏
芭苴召對文華殿賜茶賜羹又召對中左門疏凡三
十餘上每奏上輒稱善有重務則問輔臣職方云何
嘗劾罷不職督撫四人陞太僕寺少卿歸

吳元伯字開吳江夏人少孤力學腹笥淹洽癸酉舉
於鄉庚辰特賜進士歷官山東叅政病乞歸年五十
八卒以子升來貴勅贈文林郎

以上舊通志

皇清胡念祖字鶴心大冶人順治丙戌舉人性至孝奉

母依依色養署羅田諭勤於課士端方不苟清苦
逾寒素卒於任

張燕翼字安仲江夏人順治戊子舉人以戊戌會
副授黃陂諭陞禮部司務究心理學言動以禮士
人奉為楷模嘗有以金見寄者其人已歿訪其孤
還之以病卒於官

余順明字麗生大冶人玉節第五子以副車讀書
成均選深州倅能聲大著薦授藁城令順治初補

知華容時版輿新附加意拊循兵民賴焉念母老
告歸色養數十年母年八十有四卒順明哀毀亦
卒

周家鼎字峙鉉江夏人明懷宗己卯舉人隱居講
學當事聘主江漢書院纂修通志皆辭不肯就先
是二丁祭外諸生白首有不知先生誕辰者鼎率
兩庠子弟即八月二十七日詣廟舉慶賀禮歲以
為常鼎遇物無町畦而名義所關毫不假易年六

十八卒

方師誨字忠焉興國人初以鄉舉授教職登壬辰進士知定襄縣在官廉介歿於任至不能具棺

吳景祉字二來興國人順治乙未進士知南豐縣每答人至十輒淚下或勸其稍自潤祉曰視作秀才時何如而尚求贏餘也焚香告天幽隱無忤及罷官貧不能治歸裝子甫生領解始旋里徜徉邱園不干州郡事年八十餘卒

楊兆傑字又仁江夏人少倜儻負奇氣順治丁酉
舉於鄉授雲南大理推官時滇南初定悍升驕將
常起大獄沒人財產兆傑每案必多平反臺司深
重之擢兵部職方主事條論節冗費清盜源及請
裁提督文武兼制申議楚糧諸務皆練達中機宜
康熙戊申安南王黎維禧逐都統莫元清流寄滇
境擇材辦者往諭廷議推兆傑偕侍讀李仙根往
比至維禧殊簡傲兆傑引律典切責維禧懼出郭

迎

詔拜伏如禮仍令退還高平四州地及降人安置元清

還報稱

旨旋權淮關丁父艱歸廬墓山間兆傑至性孝友後母
異弟無間言嘗還有夫之媵歸何閤中曹應昌兩
櫬於萬里外平生尚義事多類此

謝應璜字皇黼蒲圻舉人以身言書判考上上等
授崇仁令崇劇邑璜一歲疏六年逋賦勸輸有方

又劇盜蔓延六邑為崇害數十年璜單騎入其壘
披心撫諭稽首受降調滇南河西縣卒於官

鄭邦相字又儵咸寧人順治戊戌進士授鄱陽令
為政簡易庭無滯獄凡布帛菽粟悉聽民折以輸
糧詳請北運就本縣交兌民甚便之舊湖中多盜
招其魁令捕黨自贖邑為建得眠亭擢知滁州時
地震城圯於河募善水者取輒而償以錢城成費
減什伍丁祖母憂即不仕居林下十五年卒子之

諶辛丑進士任左春坊左贊善

以上舊通志

吳琮字峻季江夏人裕中季子由明經授嘉魚學
博教諸生以實學實行壬寅令任邱兵燹後捐修
學宮按季課士期年人文大盛學宮傍舊有苦井
至是忽化為甘泉涖任九年日設天鑒在茲一簿
畫之所為夜即書之及歸里當事造廬相訪凡邑
中不便於民者必力陳其弊年六十有四卒

鄧文源字蒼麓江夏人康熙丙午鄉試除任邱

令潔已愛民以最擢比部主事遷員外聽獄決疑
前後得減等四百餘人移水部授鞏昌知府以憂
還服闋赴補卒於京邸

袁還樸字魯生其先石首人父僑居江夏因家焉
樸中康熙丙午鄉試授四川梓潼令招輯流逋民
以安集陞知莒州莒故多頑梗懲其尤者一二人
奸宄屏跡值蝗蝻大作晝夜掩捕積勞成疾乞休
歸莒人立祠祀之

胡鳴臯字雲翥江夏人康熙庚戌進士令青縣以
逃案罷巡撫于成龍特疏開復補汶川汶故羌番
出沒地抗賦叛役無寧歲臯宣德意不率乃請往
擒其魁擢代州代役苦偏累編審時逐戶研訊役
遂平以內艱歸補臨清屢折大獄無所假借卒於任
王渭鼎字呂倩武昌縣人康熙壬子舉於鄉戊辰
授衡山諭興學校課士有方卓異陞河南澠池令
再任江南興化值河決詳請蠲賑省高郵漕兌之

擾修海溝河工著有成績壬午分校南闈特陞陝西寧羌知州州患虎禱於神遁去旱祈輒應又捐俸修南棧諸險後攝沔篆而卒

周士皇字偉臣武昌縣人有行子康熙癸丑進士辛酉以觀政守部分校順天鄉試除扶溝令修學減役善剖疑獄扶人德之行取戶部主事遷貧外郎考選陝西道御史後督理長蘆鹽課釐奸剔弊轉河南道陞通政卒於京

恩予馳驛歸櫬

宋長春字栢山蒲圻人事母以孝稱性倜儻從軍
岳州隨征吳逆授火器把總舟次蘆蓆口賊以椿
植水中堅不可拔春入水連拔數十旋用火焚賊
船岳州平從提督萬入閩配船出洋克復南日等
處直抵廈門功上授都督僉事管西安州遊擊事
捐俸立義學教軍民子弟獲大盜金維正等寘之
法陞紫金關叅將施棺木助婚娶平米價嚴關隘

晉雲南右協副總統叅將李達等擒逆苗陸尚賢
將卒欲盡誅餘黨春曰彼既歸誠苗民即吾民也
何多殺為由是廣南悉靖以積勞染瘴年五十七
卒

馬之鵬字文淵蒲圻人康熙乙丑進士令博白有
失子者控縣訪之不得鵬清保甲至近地見一人
有異訊之獲其所殺尸於河中遂寘諸法一縣稱
神又計擒積盜黃叔元民害以除丁外艱補元謀

令時盜魁李玉林等入貲為撫吏鵬揭其事捕治之以俸滿陞工部主事歷遷兵科給事中辛卯典試山左壬辰疏會審遲延潮鹽加派會試中額三事

聖祖俱獎諭施行癸巳掌錢法力清宿弊甲午轉戶科僅六閱月卒卒後無三日糧其清操如此鵬性孝友親族困乏者周之如不及能以清白世其家子格甲午舉人杞祝俱庠生

孫日旋字敬亭父丕垣休寧人遷居江夏日旋中
順治丁酉武舉性至孝父病祈以身代父歿廬墓
十餘年乙丑授松江千總旗丁中有婦少寡遭事
不白欲自縊為白之得全解橐金贖客舟鬻女完
逋者遷大嵩守備歲荒寬賦撫卹審丁缺額鬻產
代完之念父三十鰥居甫強仕喪偶亦不娶從弟
早逝給養其遺孤解組歸年八十卒子芝璫歲貢
芝瑞黃岡訓導孫都銓邑庠生

方文瑞字河書江夏人康熙甲戌進士初令考城
時水旱洊饑瑞開渠築隄勤勞撫字請增學額行
取工部主事清操自勵餽遺一無所受乙未分考
禮闈稱得人擢工科給事抗直有聲尋擢禮科性
純篤以孝友聞俸錢不營生產置義田數十石以
贍族母老不能迎養後聞訃哀毀邁疾卒

王開泰字乾來江夏人康熙庚辰進士館選改授
博羅令徭役繁重民力困弊泰下車痛革之邑多

訟發奸摘伏剖決如流絕請託卹孤寡課文禮士上
下稱之以艱歸民泣送有至千里外者補慶元民
俗刁悍泰一以禮諭有積冤十餘年不伸兩仇相
構至棄廬墓而竄廡得其狀平反之遂各歸故業
視事八閱月以勞瘁卒

張謙字子吉號酉山武昌縣人康熙庚辰進士筮
仕四川珙縣荒僻無城郭民與苗蠻錯壤前令與
土豪何姓者為仇捏詳隱糧故珙賦較他縣獨重

田入不足供民皆鳥獸散又州縣酒米諸費悉取
於民胥吏因以為虐謙釐革殆盡勸民開墾荒田
約歲入以十與佃二供賦逃亡始鳩聚焉珙惟上
羅鄉羅星河達叙之大江有歐趲二灘巨石挺立
舟過者不覆則破謙貸金二百名石工焚鑿之水
勢頓平珙穀價輕而鹽貴謙詳請富順鹽引俾客
舟以鹽入者以穀出民得穀之利益事開墾建官
廨立倉廩勤月課示文體待苗夷以誠期會風雨

必出虎豹之皮及鹿茸線錦之屬獻則却之終任
七年苗皆帖服時撫臣令各縣加賦諫極言珙地
瘠民貧獨免加賦壬辰行取刑部主事甫六日晉
貢外郎歷郎中謙精於律例大司寇見謙稿即判
行念充軍一條內載應坐者六十以上皆遣發年
老多道殍即條請免其行留獄中給食之有力者
聽贖竟蒙

題允丁酉典試黔中所得皆名宿是科磨勘稱貴州

天下第一庚子督學雲南凡歷來賄進竄籍替考
諸積弊力為清除雍正元年擢雲南按察使司嚴
懲賭博驅逐土娼民翕然向化甲辰授大理寺左
少卿奏對

賜御書雀舌茶

上聞謙有疾遣醫調治溫慰有加旋巡撫貴州

恩賜稠疊行至沅州驛舍卒年六十有九旅櫬蕭然署
貴撫總兵石支藩庫羨銀五百兩妾官經理其喪

因摺奏奉

硃批朕覽石禮哈所奏不禁戚然張謙歷任廉潔想家
道自然艱難靈柩回籍著賞銀一千兩

賜祭葬諱天性孝友弟歲早卒哭之極哀髮驟白生平
有餘俸分給親友囊不留一錢予元鈺康熙丁酉
舉人

特授遵義府通判調正安州牧

湖廣通志卷五十一